

岭
南
遗
书



翰林記卷第十

嶺南遺書

香山 黃佐 才伯撰

大本堂授經

國初置大本堂取古今圖書充其中召四方名儒教皇太子親王用學士宋濂待制兼編修王禕修撰王愷耆儒陶凱輩分番夜直選才俊之士充伴讀所授經書上親督之嘗命禕采故實韻爲四言詩以授皇太子時時賜燕賦詩商確古今評論文字無虛日尋命勛舊之子執經入侍於是鄭國公常茂曹國公李景隆靳春侯康鐸等與焉洪武元年十一月辛丑燕東宮官及儒臣各賜冠服是日上命大本堂諸儒作鍾山蟠龍賦置酒驩甚乃自作時雪賦

故有是賜其後皇太子讀書在文華殿而親王則出就所
居府十二年三月戊辰朔上御華蓋殿皇太子侍上問比
日所讀何書對曰昨看書至商周之際上曰看書亦知古
人爲君之道否因諭曰君道以事天愛民爲重其本在敬
身人君一言一行皆上繫於天下繫於民必敬以將之而
後所行無不善蓋善天必鑒之一言而善四海蒙福一行
不謹四海罹殃言行如此可不敬乎聖祖之始訓如此真
可謂得其大本矣諸儒授經惟奉行上意而已嚴君在上
賢師友輔之睿德之懋斯可望矣

東宮師友

太祖始令宋濂爲王世子師庚子年十月奉命入內授經

遇綱常大義再三言之乙巳年三月濂以起居注告病詔
還家醫治仍賜金帛世子致賜有加焉六月濂上箋謝恩
復奉書東宮勉以孝友恭敬謹敏讀書無怠惰無驕縱修
德進業以副天下之望上覽書喜甚召東宮語以書意且
賜書答之其畧曰曩昔先生教吾子以嚴相訓是爲不佞
也以聖人文法變俗言教之是爲疏通也所守者忠貞所
用者節儉是爲得體也昔聞古人今則見之復以文綺侑
書洪武元年設東宮師傅官令勲臣兼之十月以耆儒梁
王儀爲太子賓客秦鏞盧明德張昌爲太子諭德上以東
宮師傅皆勲舊大臣當待以殊禮朝賀東宮難同庶僚命
禮部考古定議禮部及翰林諸儒臣議今凡遇大朝賀前

期設皇太子座於大本堂設答拜褥位於堂中設三師賓
客諭德拜位於堂前贊禮二人於三師之北內贊禮二人
於堂中俱東西相向至日皇太子常服陞座三師賓客諭
德常服入位北向立皇太子起立南向贊禮唱鞠躬四拜
皇太子受前二拜答後二拜禮畢而出五年太子贊善大
夫宋濂輔導東宮一言一動皆以禮法諷諭使歸於道每
讀書至切於政教及前代興亡必拱手揚言曰君國子民
之道當如此不當如彼且推人情物理以明其義皇太子
每歛容嘉納敬禮未嘗少衰言則必曰師父師父云且書
舊學二字以賜二十六年七月戊申選秀才張宗濬等隨
詹事府左右春坊官分班入直文華殿侍講畢近前說民

聞利害田里稼穡等事開陳古今孝弟忠信文學材藝諸
故事日以爲常永樂二年春詔簡東宮官屬時詹事春坊
司經局其長貳以廷臣兼之次簡六科中書及太學郡縣
學官陞而用之於是以尙書蹇義兼詹事侍郎郭進等兼
少詹事黃宗載兼府丞尙書李至剛內閣七人者皆兼春
坊庶子諭德等官修撰梁潛等兼贊善而國子博士徐善
述助教晁鑄等陞左右司直郎有差尋又以贊善王汝玉
等兼編修善述暨汝玉東宮尤見親禮嘗令善述擇選詩
二十餘首分類賦比興以爲法又與之書言欲學作表卿
可一如詩題立例具詩題與表題閒日封進且問其疾勞
慰備至且曰卿今年邁恐輔余爲學有日似卿樸直苦口

者百無一二面諛順顏者比比有之趁卿康健無憚勞勩
弼余成業惟望藥石之言一日甚一日毋務犯鱗觸諱之
慮其所與書必字之曰好古或曰致書贊善好古先生云
其與汝玉書有曰願求致治之方又曰善教之音如至有
如暗遽明之喻其望啓沃之切如此每遇節序燕勞東朝
之臣起居慰問煦濡諄切一如家人父子焉然太宗常恐
東駕親近匪人每北巡必訓戒之又命學士胡廣楊士奇
楊榮侍讀學士王達洗馬楊溥等廣求名儒分直講讀而
典籍金寶郎中葉砥等與焉每講罷必從容以正心務德
親賢去邪尙儉戒逸之言進及訪以政事必陳其切要及
先後緩急之序懇切無少避忌故仁宗之爲皇太子也監

國視朝之暇專意文事手不釋卷被服寬博大類儒者蓄
經籍法書甚富云大明會典曰永樂初定東宮講讀儀春
坊官與翰林院官日分二員講書以四書春秋通鑑大學
衍義貞觀政要等書進講須要纂其事之始終直述大義
輯成篇章進呈御覽畢然後赴文華殿講說三師三少及
詹事府官鴻臚寺併每科給事一員侍立進講畢眾官齊
出及有召問亦須前項官員一同進出如有獨進并獨員
留後者許給事中并鴻臚寺官司直郎清紀郎糾劾凡講
讀畢每遇上發落五府軍政六部緊要事務及撫諭四夷
恩意其大經大法詹事府掌同春坊官將緣由於眾官未
退之時一一敷陳爲三朝聖諭錄焉永樂二年七月侍讀

學士王達講乾之九四舉儲貳爲說講畢東駕召楊士奇
問曰於此恐無儲貳之說達不含譏否士奇對曰諸臣非
正道不陳豈敢含譏此出宋儒胡瑗之說殿下曰對我言
此常人得此爻亦用此說乎士奇因舉程子云凡卦中六
爻人人有用聖賢有聖賢用衆人有衆人用君有君用臣
有臣用無所不通又舉王昭素對宋太祖之言以對殿下
說又對曰今翰林春坊諸臣分撰諸經講章有上旨命內
閣之臣閱未當處悉與改正然後呈覽允當然後以講內
閣解縉專閱書胡廣閱詩金幼孜閱春秋臣士奇閱易昨
日進至此條上問儲貳說有據否臣士奇對以胡瑗之說
上甚喜蓋講臣非有據不敢妄出意見殿下喜自是講義

有疑慮必召解胡等四人相與辨析暢而後已遂作數鉅册命春坊司經局臣分錄講章以備常閱

東宮出閣講學

凡東宮年八歲卽出閣講學永樂以前東宮皆年長英宗未及出閣遂登大寶故出閣之儀至天順二年始定其講學師友惟東宮官及本院官分班講讀內閣提督之不別選他職其講讀侍班及校書正字官從內閣具名奏請每日講書直解先送內閣看定講畢補進與經筵同列以史官修撰編修兼校書正字則以制勅房官兼之會典載初出閣儀云是日早侍衛侍儀如常儀執事等官於文華殿行四拜禮畢鴻臚寺官請皇太子陞文華殿執事官導引

至殿陞座師保等官於丹陛上行四拜禮畢各官退出內侍官導皇太子至後殿陞座以書案進每日侍班官侍讀講官以次進讀叩頭而退每日講讀儀云一每日早朝退後皇太子出閣陞座內侍以書案進不用侍衛侍儀執事等官惟侍班侍讀講官入侍叩頭禮畢分班向東西立內侍展書先讀四書則東班侍讀官向前伴讀十數遍退復原班次讀經或讀史則西班侍讀官向前伴讀亦如之務要字音正當句讀分明讀畢各官退一每日巳時侍班侍讀侍講及侍書官皇太子陞座畢入東西向立侍班內侍展書先講早所讀四書則東班侍講官進講一遍退復原班次講早所讀經史則西班侍講官進講亦然務要直言

解說明白易曉講畢內侍收書訖侍書官向前侍習寫字
務要開說筆法點畫端楷寫畢各官叩頭而退一午膳後
從容遊息或習騎射一每日晚讀本日所授書各數遍至
熟而止一凡讀書三日後一溫須背誦成熟遇溫書日免
授新書講讀官通講須曉大義一凡寫字春夏秋月每日
寫一百字冬月每日寫五十字一凡遇朔望節假及大雨
雪隆冬盛暑暫停講讀寫字今按此儀稍變永樂之舊矣
成化中孝宗出閣最勤學十九年御製文華大訓成少詹
事兼學士彭華進講東閣加從二品祿左中允周經亦預
講是書東閣每起立拱聽內閣大臣或以爲勞謂經宜跪
請坐聽經不從竟得如禮蓋將以隆君父之道也宏治中

武宗在東宮學士吳寬率同僚上疏曰竊惟東宮講學自
寒暑風雨朔望令節外一歲之中不過數月一日之內不
過數刻况其閒又多閒歇人生八歲出就外傳住宿於外
誠欲離近習親正人也庶民且然况有天下者乎借曰習
讀於內終不若出就外傳親近儒臣講明治道所得爲多
也其意甚美然講讀之後敷陳時政如永樂時最爲要務
惜寬建言未之及耳

東宮禮儀

凡東宮禮儀官詹事府者皆宜諳練洪武中定奏事之儀
具有次第獨於文華殿啓事則詹事府在先餘依奏事次
第每皇太子御文華殿官員人等承旨召入者方許人凡

啓事者稱臣會典載東宮朝儀云永樂二年定文武官員常朝行叩頭禮畢三師三少詹事府官左右春坊官翰林院鴻臚寺官六科給事中錦衣衛官左右序立於文華殿門之外鴻臚寺序班通事舍人引文武百官於丹陛上丹墀內東西序立照依衙門資次啓事監察御史二員司直郎清紀郎日輪二員北向侍立糾儀啓事畢百官齊退及有召問亦須前項官員一同進出如獨進并獨員留後者許監察御史鴻臚寺官司直郎清紀郎糾覈一合啓事務在京衙門止用奏本在外衙門務要奏本一本啓本一本其詹事府主簿錄事同春坊官六科給事中逐一奏聞主簿錄事司直郎清紀郎司諫仍於司禮監共關揭帖開寫

逐日啓過本內事件畧節緣由六科給事中亦具題帖各
另奏進凡遇正旦冬至節行慶賀禮并進歷進春等事詹事
府例該啓皇太子知必先奏聞俟得旨方具啓本進凡遇
皇太子千秋節行慶賀禮奏啓本同進侍班用坊局官見
第六卷正旦冬至千秋節禮部官進箋并進歷進春通事
二員舉案又有監國等儀以非常典故不悉記

皇太孫輔導講讀

皇太孫輔導講讀在洪武時無可考者太宗以東宮官僚
兼之永樂六年七月命內閣胡廣等輔皇長孫賜勅曰朕
惟令德所成本乎天賦養正之學實宏聖功故有聰明純
一之資必有詩書禮樂之教所以充其德性而廣其器識

也朕嫡長孫天章日表玉質龍姿孝友英明寬仁大度年
未一紀體具志寧動必中規言必中道好道之篤夙夜孜
孜日誦萬言心領要義朕常試之以事輒能裁決得中斯
實宗廟之靈上天錫慶篤生異質以福佑天下而基命於
無窮然宏材之建必由匠石之功圭瓚之成必假琢磨之
力卿皆茂簡德藝職輔東宮東宮之子必資兼弼宜協同
心志輔導於成推廣仁義道德之源開陳二帝三王之治
與太祖高皇帝之大經大法凡創業守成之難生民稼穡
之事朝夕講論以涵養本源恢宏智量充其盛大之器以
爲宗社生民之福國家有無窮之休卿等亦有無窮之聞
欽哉九年九月皇太子命楊榮等侍諸皇孫讀書文華後

殿且諭諸皇孫曰此皇祖近臣汝輩當加禮敬又謂榮等曰他日學成卽汝訓迪之功也後皇太子復傳上命召吏部翰林院官令舉老成正大儒者侍皇太孫講讀明日東宮特召尙書蹇義及楊士奇問已得人否義對曰臣兩人共舉禮部侍郎儀智然衆鮮知之議尙未決東宮曰往者吾舉李鼎大誤後悔無及智甚端正但覺老矣士奇對曰智雖頗老然起家學官道理明執守正精神不衰目前廷臣中老成正大未見其比是日午朝上問東宮曰太孫處侍從講讀已得人否對曰已舉禮部侍郎儀智然議尙未決上喜曰此得人矣雖年老然識朝廷大體能直言不阿向之元正日食呂震等皆欲行賀禮惟此老與楊士奇言

宜免賀朕從之智誠可用遂召禮部翰林諸臣諭曰儀智甚好朕知之矣令侍太孫講讀又令尙書蹇義選近臣行止端慎語音明正者以充講官於是給事中林長懋張瑛陳山戴綸等得入侍皇太孫已而宣宗正儲位長懋等俱授春坊左右中允其講讀儀雖不可考要之當與東宮無大異也

親王出閣讀書

洪武中親王出閣命選儒士授本院博士等職事令於各王府講說永樂中妙簡宮僚以輔諸王於是以詹事府丞周孟簡爲襄王府左長史司直郎金寶爲衛王府左長史俾輔導侍講讀其後親王出閣止除進士之老成有學問

者除檢討及王就封卽拜長史不復陞轉宏治三年進士
被是選者恣出怨言吏部聞之實人情不堪之故也苟行
通融之法陞轉如常格自當無不効命者會典云諸王讀
書用內閣提督檢討等官講讀爲擬定經書起止所習做
字每日進看其儀天順二年始定初入書堂其日早王至
右順門之北書堂面東中坐提督講讀并講讀官行四拜
禮畢內官捧書展於案上就案左立講讀官進立於案右
伴讀十遍叩頭退每一日講讀清晨王至書堂講讀官行
叩頭禮伴讀十遍出飯後復詣書堂伴讀看寫字畢講書
直說大意畢仍叩頭退內侍以所寫字送內閣點看

習書

習書雖六學之一藝然事屬經筵頒爲帝制亦不可以爲末務洪武時無可考太宗喜楷書時典籍沈度書法豐潤上深愛之每有大制作必命度謄寫累遷至學士惟食學士俸仍事書辦賜象笏鏤金刻度姓名其上以寵耀之其弟粲亦起自書辦累官侍讀自此沈字盛行於朝然上習書尙未以度字爲式宣宗自冲齡習古法帖宸翰妙絕蓋始學趙孟頫而加以邁勁真所謂精能之至出神入化者孝宗亦愛沈度書宮中妙習焉嘗求其後官之物色得其孫世隆授之中書舍人故今朝廷制誥猶用沈體云

翰林記卷第十

翰林記卷第十一

嶺南遺書

香山黃佐才伯撰

知制誥

翰林職代王言唐以應行文字待詔北門與中書舍人分掌制勅謂之兩制宋始有知制誥之名然而初入院者旋即得遷其任尙輕其後試博學宏辭中科者始獲任用然屬之中書國朝兩制悉歸本院非鴻儒厯顯秩者不可掌而以中書主謄寫吳元年十二月乙丑上命開讀詔赦前期翰林院官承制草詔及文武官除授合用誥命勅命皆即日撰寫故學士陶安宋濂輩繫銜皆曰知制誥於時封拜無虛日安等嘗撰誥命千餘首以待而猶不足乃使諸

儒士在館者分局代爲之其後一定封贈之制初除授所
領誥勅皆革去於是其務稍省矣永樂初內閣七人掌內
外兩制嘗見楊榮金幼孜諸人自署職銜亦曰知制誥用
洪武時故事也仁宗始命內閣專典內制而擇學士一人
專管文官誥勅正統以後罷之文官誥勅皆屬內閣如永
樂時宏治七年復設以學士年深或尙書侍郎兼者爲之
亦得以知制誥自署兩制遂稍分矣按宋兩制曰冊文表
本青詞密詞祝文齋文詔書批答口宣內制也曰皇后皇
妃追封先代皇女皇族冊封進封文武百官遷擢致仕加
恩等誥勅外制也若國朝內制則制勅誥旨誥命冊表寶
文郊祀祭文祭享太廟文皇太后授冊寶謁謝文皇后授

冊寶謁告文皇妃授冊祭文祭陵文皇太子親王等冠辭
祝辭親征禡祭旗纛露布巡狩所至祭山川旗纛輶祭文
走驃騎祭馬神等及五祀祭文大喪及皇妃贈諡等冊文
親王妃公主郡主郡王妃世子世孫及妃鎮國等將軍喪
葬祭文諡冊壙誌諭祭文及文武大臣諭祭文經筵講章
碑額及題奏揭帖之屬外制則文官誥勅而已凡五府六
部等衙門請勅行事備詞奏請既得旨移文本院依奏草
勅內閣卽時擬撰文官誥勅之類亦然進稿畢編類勘合
中書舍人領出書寫其王府諡冊等文禮部抄出施行原
稿俱繳納云

視草

凡王言例先具稿進呈謂之視草待上允而後行諸般播告兩制皆然洪武中有大政令詞臣錄聖語不敢增損故凡詔令多爾每好生等字者皆聖祖所面授也其後始令本院官爲之漸至駢儷永樂二年楊士奇等進呈勅邊將稿上曰武臣邊將不諳文理只用直言俗說使之通曉庶不誤事他日編入實錄卻用文六年冬巡狩北京詔書命士奇視草上覽之再三喜曰簡當更勿改易其擇日書之頒下又曰試與諸尙書觀之諸尙書皆稱善獨兵部劉儁私於士奇曰請以有字易自字如何士奇曰善卽以告於衆衆曰義無相遠不足易且上旣善之士奇曰吾將以聞請易之黃淮於上前執不足易士奇曰於國家大體尙當

用儁言上顧士奇曰從汝明日諭胡廣曰楊士奇能服善
難得二十二年十月仁宗御西角門視朝罷時風寒顧謂
翰林諸臣曰朕與卿等居重城中猶覺凜凜如此守邊將
士晝夜嚴警殆不可勝遂命書勅遣使以鈔幣賜緣邊將
士宣德五年二月上御南齋宮召楊士奇諭曰吾欲下寬
恤之令今獨與爾商之然吾未能悉知爾當効助益遂命
內侍具楮筆上曰免災傷稅糧當是首事聞民間虧欠畜
馬驢騾所司追償甚迫民計無出亦甚艱難部官坐視而
不言對曰陛下聖念及此生民之幸然所當寬恤者殆非
此兩事因言百姓積年負欠薪芻及採辦買辦之物所司
責償甚急各處官項起科不一而租額皆重蘇州尤甚細

民至於逃徙部符下郡縣採辦買辦諸物一概派徵非出產處百姓數十倍價買納年來刑獄冤濫者多工匠之弊四方遠近每戶不問幾丁悉在京多爲所管之人私役南方運糧甚難而倉廩無關防姦人盜竊動輒數萬若此者請有以處之上以爲然卽令草勅明日頒行遂令尙膳賜饌勅諭旣下上聞眾心悅戴召士奇賜鈔三千緡文綺二端羊酒士奇叩頭受賜上笑曰薄用潤筆耳七年二月上召士奇至文華殿諭曰憶五年二月共爾南齋宮論寬恤事今兩閱歲矣民事不又有可恤者乎士奇復言戶部沮格官田減租及課程選舉等數事且曰臣一人見聞不廣願更得一人同論此事上口若多令人知卽勅諭未下事

已徧播於外矣曰大臣中固有謹厚者上曰胡濙謹厚汝
與之密議就錄稿進來於是退同濙議增十數事通錄明
旦進呈上悅三日朔璽書遂下是時君臣同心言聽計行
澤及天下如此景泰未易儲大學士陳循等陰主其事詔
旣下視草實出循吏部尙書何文淵謂人曰詔語天祐下
民作之君父有天下傳之子吾所爲也獨石關報捷詔獎
之循視草乃反加詰責其後與文淵皆被禍循就逮時或
以復辟詔書問之循爲一聯云多難興邦高帝脫平城而
祚漢殷憂啓聖文王出羑里以開周上聞之喜遂免循死
天順初承天門災上下詔責躬實修撰岳正視草厯陳弊
政詞極切直天下傳之遂有飛語指爲謗訕七月內批降

正爲廣東欽州同知由是言之視草固非易事也

撰表箋

洪武六年九月庚戌詔禁四六文辭先是上命翰林儒臣
擇唐宋名儒表箋可爲法者遂以韓愈賀雨表柳宗元代
柳公綽謝表進上命中書省臣錄二表頒爲天下式因諭
羣臣曰唐虞三代典謨訓誥之辭質實不華誠可爲千萬
世法漢魏之間猶爲近古晉宋以降文體日衰駢儷綺靡
而古法蕩然矣唐宋名儒輩出雖欲變之而卒未能盡近
代詔誥章表之類仍蹈舊習朕常厭其瑇琢殊異古體且
使事實爲浮文所蔽其自今凡誥諭臣下之辭務從簡古
以革弊習爾中書省宜播告中外臣民凡表箋奏疏毋用

四六對偶悉從典雅十二年六月壬申命翰林院定皇太子與諸王往復書簡之式二十九年八月上以天下諸司所進表箋務多奇巧詞體駢儷心甚厭之乃命學士劉三吾右贊善王俊華撰慶賀謝恩表箋成式頒於天下諸司令如式錄進自是詞垣秉筆者多用散文如宋濂進大明律表是也太宗在北京有白鵲之瑞行在禮部行南京慶賀自皇太子監國以下及五府六部例各進表時楊士奇以病在告監國表命庶子贊善呈稿殿下不憚命尙書蹇義持以示士奇士奇曰甚寂寥且不著題似賀白龜白鹿皆可因命改益士奇改一聯云望金門而送喜馴彤陛以有儀後增一聯云與鳳同類蹒蹒於帝舜之庭如玉之輝

韜韜在文王之圃義以進殿下喜曰此方是帝王家白鵲
適內使陳昂進御饌徹以賜之且有旨使勉進藥食早相
見也按國初陞除猶有具表陳謝之文其後惟狀元率諸
進士謝恩衍聖公及公侯伯襲封謝恩始用之車駕幸館
閣及太學初開經筵及有非常之賜亦具謝表朝廷有大
喜慶及諸祥瑞具賀表進呈實錄及書籍等皆具進呈表
例本院詞臣司之若有東宮則增一箋云會典云凡南京
各衙門遇朝廷冊立大禮及上徽號等項合用慶賀表箋
南京禮部行南京翰林院撰進

評駁奏啓

洪武十四年十二月丁巳命翰林院編修檢討典籍左春

坊左司直郎正字贊讀考駁諸司奏啓以聞如平允則署其銜曰翰林院兼平駁諸司文章某官某列名書之永樂以後四方章疏經御覽者內有艱詞難字始令本院考究不復先期平駁

評駁進呈試錄

凡鄉試錄舊制例進呈祖宗時令翰林院儒臣評駁之後其制漸弛成化十四年天下鄉試錄多舛謬或犯國諱少詹事兼侍讀黎淳摘奏十條下禮部翰林院議治考試提調官罪且申定格例行之至今按是年山東刻文論語不曰堅乎磨而不磷不曰白乎涅而不緇最爲紕繆遂逮舉人張天瑞治之以墨卷不同乃止其嚴如此

正文體

國初文體承元末之舛陋皆務奇博其弊遂寢萎蕪聖祖
思有以變之凡擢用詞臣務令以渾厚醇正爲宗洪武二
年三月戊申上謂侍讀學士詹同曰古人爲文章或以明
道德或以通當世之務如典謨之言皆明白易直無深怪
險僻之語至如諸葛孔明出師表亦何嘗雕刻爲文而誠
意溢出至今使人誦之自然忠義感激近世文士不究道
德之本分不達當世之務其辭雖艱深而意實淺近卽使
過於相如揚雄何裨實用自今翰林爲文但取通道理明
世務者毋事浮藻於戲大哉皇言乎萬世之通訓也然近
日文體或務追秦漢而失之險或駕言韓歐而失之弱本

院儒臣宜知所守然風靡者多矣舉聖謨以戒勅之是在
當宁

應制詩文

本院以供奉文字爲職凡被命有所述作則謂之應制然
祖宗皆出於面命或相與賡和其後惟中官傳旨而已丙
午年六月早上禱大雨鍾山獲應賦七言喜雨詩命待制
黃哲等賡和已而諸將告捷多令翰林諸儒臣應制賦詩
上親加評品洪武元年十一月召大本堂儒士試以鍾山
蟠龍賦時與文學之臣燕飲賡和語在第六卷大誥三編
成命學士劉三五爲序旣成上評以爲疵祖訓成學士宋
濂被命序其後精誠錄成則命大學士吳沈序之太子正

字桂彥良入見上命制香几贊司直郎汪仲魯被命制續薰風南來諸曲皆稱旨洪武八年五月丁丑上御端門召翰林詞臣出示巨桃半核蓋元內庫所藏物其長五寸廣四寸七分有西王母賜漢武桃及宣和殿十字命宋濂撰蟠桃核賦又嘗命宋濂咏鷹濂七舉足而成有自古戒禽荒之言上稱賞曰卿可謂善諫矣十年十月造觀心亭於宮城上親幸其中召濂爲記十二年上製十題命典籍吳伯宗賦之援筆立就詞語峻潔上嘉其才敏賜織金錦衣嘗幸清流關賦詩命扈從儒臣和之起居注劉季道有治不教時還縱逸功成猶遣厯閒關之句上嘆賞曰可謂安不忘危賜以白金文綺又起居注符子杰應命卽物賦咏

立成上大悅特寵賜和章一日命羣儒造繼泰鶴文吳府
伴讀王驥摻觚立就學士宋濂爲之進呈上稱善及日將
南至大祀於園丘上復命羣臣賦七言律十二韻冠以三
百言序驥與王咏先成跽讀御榻前上聽畢加獎勵命進
學士云五十年學士宋訥撰宣聖廟碑稱旨改文淵閣大
學士洪武二年二月乙亥立皇陵碑學士承旨危素承命
撰進尋以辭多潤飾乃御制一篇閱江樓成宋濂被命撰
記上亦更制一篇加評隲焉聖祖之崇文如此洪武二年
正月丙申朔封京師及天下城隍神秩號有差命翰林撰
文頒之其後革去學士宋訥嘗被命撰僧道領敎事者勅
命千餘通其後又革去永樂八年二月上親征北虜壬戌

度野狐嶺至嶺巔召學士胡廣等指示山川形勢與語良久奉制各於馬上賦平胡詩楊榮有曰聖主尊居四海安天教戎虜自相殘上甚喜之永樂諜知虜酋本雅失里與其下阿魯台讐殺東西奔遁亟召榮諭曰此賊果自殘滅汝前日之詩安知不爲讖乎榮下馬叩首謝上喜命賜羊酒三月乙未次清水源水皆苦鹹不可飲人馬俱渴明日營西北二三里許忽有泉湧出清澈可愛命廣與榮往觀遣中官以銀瓶汲取上親嘗之味甚甘美賜廣等飲訖士馬爭趨之皆給足命曰神應泉又明日應制撰神應泉詩銘上嘉之各賜上尊又嘗命諸文學侍從賦天馬海青歌修撰曾棨最先成爲上所褒美宣德中每遇令節令詞臣

應制賦詩是時太平無事上留意詞藝翰林儒臣嘗被命賦京師八景詩以獻曰瓊島春雲曰太液晴波曰西山霽雪曰玉泉垂虹曰蘆溝曉月曰薊門煙樹曰金臺夕照曰居庸疊翠英宗增其二曰南圃秋風曰東郊時雨爲十景焉景泰中學士劉定之應制賦元夕詩絕句百首頃刻而成又嘗以東風解凍春山雪霽等爲題令翰林學士等分詠之宏治初上注意講學遣太監戴義傳示聖意命學士李東陽等各撰詩十首用寓啓沃東陽擬十題各撰七言律詩一章曰敬天曰法祖曰勤政曰務學曰任賢曰納諫曰節用曰愛民曰恤刑曰講武上嘉納焉又嘗命內閣撰祭三清樂章大學士劉健李東陽謝遷上疏言天子祭天

地以簡爲貴祭不過南郊故祀五帝儒者非之况三清者
道家邪妄之說不敢奉詔上遂止愚按國初勳戚大臣神
道碑銘多出本院儒臣奉勅撰述其後不過私家謁請而
已至於應制詩文雖內閣罕聞焉蓋故事寢廢久矣

搜摭故事

聖祖將正位宸極命詔起居注熊鼎採故事可備懲勸者
書之新宮廂壁鼎受命具故事上之稱旨由是大見禮重
太宗將製爲善陰隲孝順事實二書以風厲天下乃預命
翰林儒臣搜摭故事以獻仁宗在東宮一日觀漢書歎張
釋之之不易得洗馬楊溥進曰釋之誠賢然非文帝之寬
仁何由得行其志臣以爲釋之漢一時不易得如文帝三

代而下不易得也退採文帝事編爲事類以獻仁宗甚悅
賜書褒美

進呈書詩文序

前輩自應奉之外以已所聞見撰述爲書進呈者殆不數
人洪武十五年二月前太子正字桂彥良入朝獻萬世太
平治要策凡十二事上嘉納之永樂七年侍講楊士奇侍
東宮皇太子喜讀易凡決疑必用著而以易斷命取朱子
本義纂其要以進名曰周易直指士奇因進曰易固爲卜
筮而作然文王周公所繫辭凡修齊治平之道悉具請編
緝以備覽觀遂輯成書以進仁宗覽之大喜名曰周易大
義賜士奇繡衣銀帶先是徐好吉作尙書直指金幼孜作

春秋直指皆以進云成化末學士邱濬纂大學衍義補書成適孝宗登極表上之上覽之甚喜批答有曰卿所纂書考據精詳論述該博有裨政治朕甚嘉之賜白金二十兩紵絲二表裏陞濬禮部尚書且命錄其副發書坊刊行至今論政務者多宗其說言足以興若濬者館閣一人而已乃若進呈歌頌詩賦則多有之太祖平陳友諒待制王禕進呈平江西頌上覽而喜曰吾固知浙東有二儒者卿與宋濂耳學問之博卿不如濂才思之雄濂不如卿洪武二年十月甲戌膏露降於乾清宮後苑松樹學士宋濂獻膏露頌三年四月陝西寶雞縣進瑞麥宏文館學士劉基獻瑞麥頌五月戊申祀地祇於方丘宿雨頓霽復爲頌獻之

四年八月平四川明昇基又獻平西頌上爲文答焉五年
六月句容縣民張觀園生嘉瓜雙實同蒂圓如合璧禮部
尙書陶凱奉之以獻詔寘之乾清宮明日薦於太廟宋濂
獻嘉瓜頌二十九年天下多嘉禾之瑞學士劉三吾進嘉
禾賦永樂二年八月周王暉於釣州獲騶虞九月丁未王
獻於闕下侍讀梁潛進騶虞詩侍講楊榮進騶虞頌己而
甘露屢降嘉禾呈瑞外國獻麒麟麟白雉元兔白鹿白象靈
犀白兔之屬榮與學士胡廣等咸爲詩歌以進上嘉之三
年九月朔賜太祖御書嘉禾詩於諸王及近臣先是洪武
二十八年九月庚戌北平永清衛之龍門有禾異莖同穗
上在潛邸遣使馳獻太祖親御宸翰賦長詩一篇以賜上

念手澤之存摹勒於石裝治成軸分賜諸王及學士解縉等又適有嘉禾之瑞縉獻嘉禾頌四年二月視學上服皮弁御宸翰賦長詩賜太子親王祭酒胡儼司業張智坐講文武三品以上及翰林儒臣皆賜坐以聽講畢賜茶明日儼等率師生上表謝賜賚有差大燕羣臣於奉天門學士胡廣進視學詩一時詞林諸儒臣咸和之八年五月己卯上北征敗本雅失里於元溟河七月壬午駕還士奇獻平胡頌及饒歌鼓吹詩十二年六月親征瓦剌敗之於撒里怯又敗之於土刺河擒斬無算八月駕還庶子鄒緝獻永樂清邊頌十七年十一月甘露降於孝陵松柏凡四日學士王直獻瑞應甘露詩十八年正月禮部郎中周訥請封

禪大臣有陰主之者於是學士胡廣獻卻封禪頌上遂止
宣德二年三月騶虞復見大學士楊榮獻頌上褒賞之
三年九月榮扈從北征凱旋進平胡詩凡十篇各立題命意
上覽之喜屢沐白金鈔幣之賜自是每同遊匪頒榮與楊
士奇等多以詩進遇令節被召宴遊亦多以詩謝恩自正
統後此事寢不聞矣

紀時政

學士宋濂嘗輯洪武聖政記此紀時之政也自後學士解
縉有大明帝紀記洪武中事大學士楊士奇有三朝聖諭
錄紀永樂宣德時際遇召對諸事天順日錄則大學士李
賢所著雖紀時政然苟及論建與所傳聞是時又有可齋

雜記專紀在已見用之事而本院故事多在焉則大學士彭時筆也謇齋瑣綴爲學士尹直所記近大學士李東陽著燕對錄則孝宗召見語也按宋有時政房每遇上召對卽貼黃具寫付之雖勝國亦然若師其迹以憑傳信亦聖政聿新之一助也

禁異說

先王之制一道德以同俗其有造言非聖者必刑無赦聖祖崇重儒道以濂洛關閩爲宗罔敢有悖焉者也永樂中饒州士人朱季友獻所著書斥濂洛關閩之說上覽之怒曰此儒之賊也時禮部尙書李至剛學士解縉侍講胡廣侍讀楊士奇侍側上示以其書縉曰惑世誣民莫甚於此

至剛曰不罪之無以示儆宜杖之擯之四裔士奇曰當盡燬所著書庶幾不誤後人廣曰聞其人年已七十燬書示儆足矣上曰謗先賢燬正道治之可拘常例邪遣行人押季友還饒州會布政及府州縣官與其鄉士人明諭其罪而杖以示罰考索其所著書焚之上復諭羣臣曰除惡不可不盡悉燬其所著書最是然成化以後學者多肆其胸臆以爲自得雖館閣中亦有改易經籍以私於家者此天下所以風靡也夫

評論詩文

洪武中上嘗召詞臣賦詩歌以爲樂且與評論詩法太子正字桂彥良每應制先眾而就嘗進曰治道具在六經典

謨訓誥願留聖意詩非所急也上深然之自是恩遇隆洽稱曰老桂不名永樂七年仁宗東宮贊善王汝玉每日於文華後殿道說賦詩之法一日顧楊士奇曰古人主爲詩者其高下優劣如何士奇對曰詩以言志明良喜起之歌南薰之詩是唐虞之君之志最爲尙矣後來漢高大風歌唐太宗雪恥酬百王除兇報千古之作則所尙者霸力皆非王道漢武帝秋風辭志氣已衰如隋煬帝陳後主所爲則萬世之鑑戒也殿下於明道玩經之餘欲娛意文事則兩漢詔令亦可觀非獨文詞高簡近古其閒亦有可裨益治道如詩人無益之詩不足爲也仁宗曰太祖高皇帝有詩集甚多何謂詩不足爲士奇對曰帝王之學所重者不

在詩太祖皇帝聖學之大者在尙書及諸書註作詩特其餘事可始緩仁宗曰世之儒者亦作詩否士奇對曰儒者鮮不作詩然儒之品有高下高者道德之儒若記誦詞章前輩君子謂之俗儒爲人主尤當致辨於此時仁宗監國視朝之暇專意文事因覽文章正宗一日諭士奇曰真德秀學識甚正選輯此書有益學者對曰德秀是道學之儒所以志識端正其所著大學衍義一書大有益學者及朝廷爲君不可不知爲臣不可不知君臣不觀大學衍義則其爲治皆苟而已仁宗卽召翰林典籍取閱大喜曰此爲治之條例監戒不可無因留一部朝夕自閱又取一部命翻刻以賜諸子諭士奇曰果然爲臣亦所當知遂賜一部

又嘗與士奇言歐陽文忠公之文雍容醇厚氣象近三代有生不同時之嘆且愛其諫疏明白切直數舉以厲羣臣遂命較正重刻以傳廷臣之知文者各賜一部時不過三四人而止恆謂士奇曰爲文而不本正道斯無用之文爲臣而不能正言斯不忠之臣歐陽真無忝矣故館閣文字自士奇以來皆宗歐陽體也

傳問事類

祖宗時文學近侍之臣皆面相問難故聖學有所發明使中官傳問事義自正統後始有之大學士李東陽嘗曰宏治中上令中官問龍生九子憶少時於雜書中見之倉卒不能悉具又莫知所出詢之羅編修玘謹疏其五六得於

其師左參政贊者止此又詢於吏部劉員外續以故冊來
而備錄其說亦不知所從出因據以復命蓋記問之難如
此

翰林記卷第十一

翰林記卷第十二

嶺南遺書

香山 黃佐 才伯撰

收藏祕書

按周禮太史掌建邦之六典外史掌四方之志三皇五帝之書漢圖籍所在有石渠石室延閣廣內藏之於外府又有御史居殿中掌蘭臺祕書及麒麟天祥二閣藏之於內禁後漢圖書在東觀置祕書監又有鴻都等處唐有祕書監集賢院宋建昭文史館集賢院置大學士直學士修撰等官以掌之又有祕書省崇文館其重如此聖祖甫定天下卽遣使求遺書國初四庫之書多藏文華堂堂在禁中抵奉天門下百武車駕嘗幸臨之洪武三年三月庚子置

祕書監秩正六品先除監丞一員直長二員十三年七月
癸巳以內府書籍已有本院典籍掌之於是罷祕書監典
籍張敏行者掌書籍中使傳宣索書卽啓鑰以上時時得
燕見聖祖稽古右文其勤如此蓋罷掌書之官併其任於
翰林實自此始今內閣史館凡御製文字宸翰列聖實錄
及玉牒副本經史子集類書之屬皆在焉永樂四年四月
上視朝之暇輒御便殿閱書史或召翰林儒臣講論嘗問
文淵閣經史子集備否學士解縉對曰經史粗備子集尙
多闕上曰士人家稍有餘貲皆欲積書况於朝廷可闕乎
遂召禮部尙書鄭賜令擇通知典籍者四出購求遺書且
曰書籍不可較價直惟其所欲與之庶奇書可得又顧縉

等曰置書不難須常覽閱乃有益凡人積金玉亦欲遺子孫金玉之利有限書籍之利豈有窮也十六年遣修撰陳循往南京起取本閣所貯古今一切書籍自一部至百部以上各取一部北上餘悉封識收貯蓋兩京皆有儲書也十九年四月庚子夜奉天華蓋謹身殿災火勢猛烈而奉天門東廡切近祕閣學士楊榮奮身直入麾武士三百人將御書圖籍并積歲制勅文書舁至東華門外河次明日上召諭之曰昨夜火發在日前者有幾人卿能收拾御書圖籍不避艱危可謂難矣因褒賞之是時書籍淆亂無紀典籍周翰理淆葺亂逾二載而後復舊今館閣書曰蓋永樂閒定也自正統以前凡官本院者每朝退卽入閣中檢

所未見書蓋館閣無政事以討論考校爲業故得縱觀中
祕而受命進學者亦與焉景泰時編修周洪謨輩猶復然
其後始爲內閣所局鑰宏治五年五月大學士邱濬請訪
求遺書言太祖於丙午年已求遺書旣平元都得其館閣
祕藏而又廣購於民間沒入於罪籍一時儲積不減前代
然藏蓄數多不無亂雜積歷年久不無鼠蠹經該人衆不
無散失今因內閣儲書有匱書目有簿皆可查考乞勅內
閣量要學士并講讀以下官督同典籍撥與吏典班匠人
等將書目較讐有無全欠分爲經史子集四部及雜書類
書二類開具奏報仍刻考較年月委官名銜識於卷末立
案存照又勅兩京內外大臣會同南京禮部本院官查盤

永樂中原留南京內府書籍有無全欠具數奏知於凡兩
京書籍令兩京國子監謄寫各令兩監藏之以備遺失夫
國家採輯佛道書以爲藏經雕以文梓飾以文綾徧賜天
下寺觀儲以髹紅函匱載以金碧輪藏况此書籍乃自帝
王傳心之要道經世之大典禮樂刑政制度文爲之所具
烏可吝惜小費而不爲經久之計哉請勅內閣將書目付
禮部抄謄分送直隸十三布政司提督學校憲臣用心設
法訪求抄寫送京以補所未備仍於內閣近便去處別建
重樓一所專用甄石累砌如民間所謂土庫者令內閣書
辦中書等官遇其閒暇抄謄累朝實錄各一部盛以銀匱
於樓之上層凡內府衙門收藏國家大事文書如玉牒之

類皆附焉其制勅房一應文書如詔冊制誥勅書等項并
檢行禮儀注應制詩文等項底本前朝遺文舊事等項雜
錄亦各抄一部盛以鐵匱貯於樓之下層凡內府衙門所
藏文書可備異日纂修一代全史之用者如永樂以前文
武官貼黃之類皆附焉苟無禦災備急之具一或散失後
之秉史筆者無所憑據往往求之於草澤訪之於傳聞簡
錄無稽真贋莫辨非但大功異政不得紀載而明君良臣
爲人所誣捏者亦有之矣至若列聖實錄及聖祖御製等
書請依洪武六年纂集日厯以爲寶訓事例勒成一書頒
行天下如此則祖宗之功德在萬世永傳信而無疑國家
之典章垂百王遞沿襲而有本所謂金匱石室豈虛文哉

奉聖旨太祖御製書籍著翰林院官打點見數收貯南京
書籍查照目錄開寫缺少的去著守備同南京禮部翰林
院檢點送來天下遺書禮部行移南北直隸十三布政司
訪求其餘罷然是時有司不能如命遂因循至今正德中
爲人盜竊殘缺日甚論道講學尙何所資邪言之可爲撫
膺不能無望於今日也

開局纂修事始

國初召儒臣載筆以定有天下之制分三局以總之一曰
律局以定律令凡舊官之練憲典者居焉二曰禮局以究
禮儀凡宿儒之通古制者居焉三曰誥局以撰誥命凡俊
才之優文辭者居焉此開局之始也汪克寬曰洪武元年

命中書省翰林太常率諸儒定擬三禮明年再命集擬禮樂又明年徧徵在野道德文章之士分局相與訂正之亦正指此其後纂修國史每分爲十館以均六局之多寡六局一曰吏以究人材之進退二曰戶以稽地利之盈縮三曰禮以考禮儀之沿革四曰兵以載軍政之臧否五曰刑以書刑罰之祥濫六曰工以審力役之糾緩皆本六官職掌爲之十館所修不能統一則擇人總勘如修他書則有不盡然者蓋自罷起居注之後本院職專文史遇有纂修旋設館席給筆札惟官長凡例是遵逐事呈稿筆削惟命其中雖有所見亦不敢盡用已意蓋官局修書從古然也

監修

洪武二年二月丙寅朔勅修元史以中書左丞相宣國公
李善長爲監修不預史事三十五年十一月己未重修太
祖高皇帝實錄勅太子太師曹國公李景隆爲監修都總
裁官太子少保兼兵部尙書忠勤伯茹瑄爲副監修官永
樂九年十月又重修之勅戶部尙書夏原吉太子少保姚
廣孝監修未及成而廣孝死原吉獨專其事洪熙元年五
月庚午朔勅修太宗皇帝實錄閏七月甲辰勅修仁宗皇
帝實錄俱以太師英國公張輔少師兼吏部尙書蹇義少
保兼太子少傅戶部尙書夏原吉監修自永樂以來多預
秉筆與國初不同宣德十年九月庚午勅修宣宗皇帝實
錄止用張輔爲監修始復不預秉筆矣監修英宗皇帝實

錄者會昌侯孫繼宗監修憲宗皇帝實錄者英國公張懋
監修孝宗皇帝實錄者亦懋也若修他書則罕設惟永樂
元年七月修永樂大典以太子少師榮國公姚廣孝禮部
尚書鄭賜爲監修刑部左侍郎劉季篋副之餘不可盡考

總裁

國初修元史以前起居注宋濂漳州通判王禕爲總裁未
幾濂進學士禕拜待制三年二月乙丑續修元史仍爲總
裁太祖皇帝實錄總裁者始爲禮部左侍郎兼學士董倫
與侍講方希直重修李景隆與侍讀解縉再重修則文淵
閣大學士兼左春坊大學士胡廣學士兼右庶子楊榮祭
酒兼侍講胡儼也太宗仁宗兩朝實錄總裁爲少傅兵部

尚書兼華蓋殿大學士楊士奇太子少傅工部尚書兼謹
身殿大學士楊榮太子少保禮部尚書兼武英殿大學士
金幼孜戶部尚書兼武英殿大學士陳山禮部尚書兼華
蓋殿大學士張瑛太常寺卿兼學士楊溥自是其柄始盡
歸館閣矣宣宗皇帝實錄總裁爲少傅工部尚書兼謹身
殿大學士楊榮行在禮部尚書兼學士楊溥總裁兼纂修
爲少詹事兼侍讀王直少詹事兼侍講學士王英總裁兼
纂修前此未有也英宗皇帝實錄總裁爲少保吏部尚書
兼華蓋殿大學士李賢禮部尚書兼學士陳文兵部尚書
兼學士彭時副總裁爲禮部右侍郎李紹太常寺少卿兼
侍讀學士劉定之吳節副總裁蓋自此始紹雖爲侍郎然

發身則自翰林故與焉憲宗皇帝實錄總裁爲少傅兼太子太師吏部尙書謹身殿大學士劉吉禮部尙書兼文淵閣大學士徐溥禮部右侍郎兼學士劉健副總裁爲禮部尙書邱濬詹事兼侍講學士汪諧孝宗皇帝實錄總裁爲少師兼太子太師吏部尙書華蓋殿大學士李東陽少傅兼太子太傅吏部尙書謹身殿大學士焦芳戶部尙書兼文淵閣大學士楊廷和副總裁爲吏部左侍郎兼學士梁儲若纂修日厯惟洪武時有之總裁爲學士承旨兼吏部尙書詹同侍讀學士宋濂聖祖所修諸書多不可考獨太宗時永樂大典分局皆有總裁學士解縉修撰吳溥檢討王洪禮部郎中鄒濟布衣陳濟等皆得爲之無慮十餘人

蓋門彙多而事實繁故也大明一統誌總裁爲吏部尙書兼學士李賢太常寺少卿兼學士彭時學士呂原副總裁爲學士林文劉定之侍讀學士錢溥大明會典總裁爲大學士李東陽焦芳楊廷和副總裁爲學士梁儲若四書五經性理大全宋元資治通鑑綱目等書多不設總裁止用纂修官

纂修

國初纂修皆用山林隱逸之士洪武日厯纂修者皆儒士職官獨員外郎吳伯宗一人戊寅年勅修太祖皇帝實錄纂修可考者爲侍讀學士兼太常寺少卿高遜志太常寺少卿廖昇都察院左僉都御史程本立禮部郎中夏止善

修撰李貫編修吳溥楊子榮劉觀檢討陳性善侍書劉彥
銘史官高讓吳勤趙友士端孝思張秉彝唐畔畊國子博
士王縉僉事胡子昭知縣葉惠仲儒士楊士奇等永樂初
重修太祖實錄纂修爲學士禮部尙書李至剛侍讀胡靖
曾日章王灌胡儼侍講鄒緝楊榮金幼孜楊士奇修撰李
貫編修吳溥鄭好義檢討王洪博士張伯頴王汝玉典籍
沈度潘畿待詔王延齡給事中朱絃吏部郎中徐旭禮部
郎中胡遠太常寺博士錢仲益國子助教王達博士金玉
鉉行人蔣驥晉府伴讀蘇伯厚僉事李燧葉砥知府劉辰
靖江府教授張顯楚府教授吳勤知府鄒濟知縣楊觀梁
潛王褒沈瑜趙委通唐雲教諭解榮劉宗平訓導富貴清

羅師程儒士端禮王孟易朱逢吉莫士安凡外官生儒之
預此者皆由本院官舉薦及再重修其纂修者學士兼諭
德金幼孜楊士奇侍講學士曾棨侍讀兼贊善梁潛侍講
王英修撰羅汝敬刑部主事李時勉陳敬宗也太宗仁宗
兩朝實錄纂修官爲左春坊大學士兼侍讀學士曾棨右
春坊大學士兼侍講學士王英右春坊右庶子兼侍讀王
直左春坊左諭德兼侍讀周述侍讀李時勉錢習禮侍講
余學夔陳循蔣驥修撰苗衷曾鶴齡張洪劉永清
編修周敘孫曰恭楊敬檢討周翰王雅楊翥五經博士陳
繼戶部主事陳中四川道御史陳叔劄福建右參議潘文
奎知縣萬節教授邱錫教諭梁萼蓋自是不復用儒士矣

宣宗皇帝實錄纂修官爲侍讀學士李時勉錢習禮侍講
學士陳循洗馬藺從善侍讀苗衷曾鶴齡馬愉侍講高穀
胡種邢寬修撰周敘尹鳳岐孫曰恭習嘉言陳詢陳叔剛
曹鼎儀銘王一寧杜寧儲懋編修楊翥董璘楊壽夫林文
鍾復主事劉玟洪璵劉球與評事張益御史邵宏譽英宗
皇帝實錄纂修官爲學士柯潛萬安侍講學士李泰太常
寺少卿兼侍讀孫賢劉珣左諭德黎淳右諭德童緣劉宣
侍講江朝宗楊守陳修撰王一彭教編修尹直徐瓊陳
秉中李永通鄭環劉健汪諧張元禎吳欽羅璟檢討耿裕
周經纂修兼校正官爲侍讀劉吉陳鑑侍講邱濬編修彭
華蓋自是專用本院及詹事府官而纂修兼校正始見於

此憲宗皇帝實錄纂修官爲太常寺少卿兼侍讀傅瀚少
詹事兼侍讀費閭左庶子兼侍讀謝遷右庶子兼侍講陸
簡侍讀曾彥楊守陟侍講劉戩王鏊楊傑梁儲左贊善張
元禎修撰劉機武衛張芮編修劉忠鄧焮黃珣張天瑞劉
春涂瑞檢討楊時暢纂修兼校正官爲南京國子監祭酒
李傑左庶子兼侍講學士李東陽左庶子兼侍讀吳寬右
庶子兼侍講董越纂修兼參對官爲修撰楊廷和編修江
澗纂修兼參對亦始見於此孝宗皇帝實錄纂修官爲侍
讀毛紀傅珪朱希周侍講豐熙沈燾吳一鵬修撰顧鼎臣
編修王俊李廷相溫仁和李時膝霄何瑋董玘檢討汪偉
王九思潘辰至於修他書者不能盡記大率成化以後纂

修皆純用本院官而永樂大典四書五經性理大全寰宇
通志庶吉士亦得與焉

催纂

洪武日厯設催纂官以侍講學士樂韶鳳爲之永樂初重
修太祖實錄催纂兼謄寫爲禮部主事陸駟瑞端孝思始
不用本院官宣德初太宗仁宗兩朝實錄因之以禮部主
事張習爲催纂宣宗實錄則又不同編修蕭鎡賴世隆吳
節徐瑄檢討李紹王汝玉姜洪何宣主事潘勤正字沈寅
俱爲稽考參對并催纂官英宗實錄以編修李東陽倪岳
謝鐸焦芳陳音程敏政檢討吳希賢吏部驗封司員外郎
韓定中書舍人馬麟焦瑠李溥俱爲催纂官憲宗實錄以

吏部員外郎季通中書舍人胡清爲催纂官蓋自此專用制勅房誥勅房官云

稽考參對

稽考參對太宗仁宗兩朝實錄以修撰邢寬蔣禮胡種編修陳詢劉矩裴綸梁禋孔目沈寅爲之蓋纂修之次也然寬乃永樂甲辰進士第一禋次之孫曰恭又次之寬禋同爲稽考參對而曰恭乃得纂修此類最多有不可曉者宣宗實錄稽考參對與催纂并爲一事英宗實錄因之止以催纂爲名憲宗實錄以纂修者兼校正或兼參對孝宗實錄稽考參對者修撰呂枬編修崔銑湛若水翟鑾徐縉景暘檢討段昺易舒誥穆孔暉張邦奇焦黃中胡纘宗也蓋

至是始復專設其賞格與催纂同

膳寫

洪武中修日厯膳寫用舉人監生永樂初重修太祖實錄以催纂者兼膳寫官其膳寫用監生生員儒士凡二十五人太宗仁宗兩朝實錄改膳寫爲膳錄用檢討許彬連智馬信周貴等四人中書舍人蕭湘等十八人郎中員外郎主事寺副等官程南雲等九人儒士生員各一員凡三十人宣宗實錄有膳寫正副本官用郎中員外郎主事寺正評事侍書冠帶秀才監生生員秀才凡二十九人又有膳稿官焉修撰黃裳編修許彬周貴中允蔣禮郎中何賢夏衡寺副石慶姚本溫良英宗實錄膳錄有太僕寺卿余

濂山東左參議林章禮部郎中吳謙等中書舍人凌暉等
又有鴻臚主簿王祐白真序班毛顯本院譯字官胡清徐
德王臣凌遠與監生生員秀才之屬共三十五人官雖不
同大率皆制勅詰勅二房辦事者也憲宗實錄亦如之自
太常寺卿林章等以及監生許鑿等三十四人孝宗實錄
謄錄者太常寺少卿沈冬魁等以及秀才張保等三十六
人

收掌一應文籍

太宗仁宗兩朝實錄收掌一應文籍者爲檢討胡讓典籍
李錫牛麟張禮宣宗實錄則爲修撰胡讓寺副陳紀中書
舍人靳通英宗實錄則爲光祿寺署丞冀舞鴻臚寺主簿

高鑑憲宗實錄則爲鴻臚寺主簿靳瑋本院孔目張翰曰
催纂而下若修他書多不可考姑闕之以俟續書

翰林記卷第十一

翰林記卷第十三

嶺南遺書

香山 黃佐 才伯撰

修日厯寶訓

聖祖時設起居注後惟專設本院史官常諭學士詹同等
曰國史貴直書是非善惡昔唐太宗觀史命直書建成之
事其意欲以公天下者也予平日言行可記其是非善惡
汝等皆當明白直書勿爲隱諱庶使後世觀之不失其實
洪武六年七月壬寅學士承旨兼吏部尙書詹同等言自
上起兵渡江以來征討平定之績禮樂治道之詳雖有紀
載而未成書乞編日厯藏之金匱傳之後世上從其請八
月甲申上御東黃閣命同與侍講學士宋濂爲總裁官侍

讀學士樂韶鳳爲催纂官員外郎吳伯宗儒士朱右趙堦
朱廉徐一夔孫祚徐尊生同纂修鄉貢進士黃昶國子生
陳益暘等謄寫九月四月開局於西華門內分年纂輯日
輪寺人守闈大官進膳羞其事甚嚴且祕同等味爽而入
至日曛始出復會宿於詞林虞有宣洩不敢不慎也十二
月擢右壘廉爲編修祚爲太平府教授一夔輩以病乞歸
許之七年五月丙寅朔纂修大明日厯成自上起兵汧濠
至卽位六年癸丑冬十二月凡征伐次第禮樂沿革行政
設施羣臣功過四夷朝貢之類莫不具載合一百卷同等
率諸儒上進命藏之金匱其副藏於祕書監同與濂又言
於上曰日厯藏之天府人欲見之有不可得臣請依唐太

宗貞觀政要分類更輯聖政爲書以傳天下後世從之於
是分爲四十類自敬天至制蠻夷釐爲五卷總四萬五千
五百餘言名曰皇明寶訓自是以後凡有聖政史官紀錄
之隨類增入按永樂以後日厯之修遂廢學士王直在館
閣私自紀述及纂修太宗實錄輯以爲寶訓然列聖以來
所謂實錄寶訓大都出於繼世之後芴菟汎索蓋有不得
其真者矣詹宋所言足爲成憲誠使史館載筆之臣日事
編纂則所謂紀言動者不至鰥官而後世觀之足以傳信
也

修實錄

洪武三十一年九月勅修太祖高皇帝實錄不知成於何

年殆不可考三十五年十月己未勅景隆等重修庚申諭
修實錄官曰此建文中信用方孝孺等纂述實錄任其私
見以致盛美弗彰爾等其以古良史自期必詳必公用光
昭我皇考創業垂統武功文治之盛與乾坤相爲無窮斯
無忝厥職矣永樂元年六月辛酉景隆等以實錄成表上
之凡一百八十三卷大行賞賚仍賜宴奉天門命公侯伯
五府六部都察院通政司大理寺國子監應天府太醫院
欽天監堂上官皆預焉九年十月以太祖實錄建文時修
多失其實永樂初再修亦倉卒未備命史臣重修勅戶部
尙書夏原吉與太子少師姚廣孝監修學士胡廣楊榮等
爲總裁金幼孜等與纂修未幾廣孝死原吉獨專其事凡

七年始成十六年五月庚戌朔原吉等以實錄進凡若干卷共二百五冊寶訓凡若干卷十五冊上御奉天殿受之披閱良久嘉獎再四曰庶幾少副朕心辛亥賜宴於禮部洪熙元年五月庚午朔勅修仁宗實錄宣德五年正月壬戌書成太宗實錄凡一百三十卷一百二十四冊寶訓凡若干卷十五冊仁宗實錄凡十卷二十冊寶訓凡若干卷六冊太師英國公張輔等表上之上御奉天殿受焉癸亥賜宴於中府賞賚如永樂時宣德十年九月庚午勅修宣宗皇帝實錄賜宴禮部正統三年四月己巳實錄成凡一百一十五卷一百一十六冊寶訓凡十二卷十冊太師英國公張輔等具表上進上御奉天門慰勞再三加陞賞焉

車本言卷第一三
賜宴於禮部一云西苑天順八年三月勅修英宗皇帝實錄附以景泰時事成化三年八月實錄成凡若干卷三百六十冊寶訓凡若干卷十二冊郝戾王附太保會昌侯孫繼宗等具表上進成化二十三年十月勅修憲宗皇帝實錄宏治四年八月實錄成凡若干卷二百九十三冊寶訓凡若干卷十冊太傅兼太子太師英國公張懋等具表上進宏治十八年十月勅修孝宗皇帝實錄正德四年五月實錄成凡一百二十四卷若干冊寶訓凡十卷若干冊太傅兼太子太師英國公張懋等具表上進自成化以來宴賚一如故事進實錄儀則具載會典云按國初儒臣徐一夔曰元朝制度文爲務從簡便且聞史事尤甚疎略不置

日厯不置起居注獨中書置時政科以一文學掾掌之以
事付史館及繼世之後則國史院據所付修實錄而已詹
事楊守陳在史館嘗言古人謂國可滅史不可滅我太祖
定天下卽命儒臣撰元史太宗靖內難其後史臣不紀建
文君事遂使建文數年朝廷政事及當時忠於所事者皆
湮沒不傳及今采輯尙可補國史之缺景皇帝已復位號
而英宗實錄標目猶書郝戾王附是宜改正舊例羣臣章
疏留中者雖有可傳皆不得書乞以留中之奏悉付史館
擇而書之蓋國初修纂聖政以爲日厯故言動猶詳後之
所據以爲實錄者惟中外臣僚章疏與所行事例焉耳二
人所論良足感也

焚稿

凡進呈實錄之日其草稿內閣大臣會司禮監官於內府燒燬李東陽曰正德四年五月二十五日在海子西岸焚實錄稿事畢尙膳供宴是日入西苑門望南臺登廣寒殿過芭蕉園而還是時焚稿例供宴也

修玉牒

凡玉牒每十年一次宗人府具各王府宗支開報內閣奏請學士等官二員纂修其修合用紙劄洪熙元年勅司禮監別造本院委官一員公同附注宣德三年命本院一員同宗人府經歷於史館內附寫其後合用紙劄宏治十年命刑部關領附注之日令吏部撥辦事吏三名宣宗宣德

五年四月重修玉牒成少傅楊士奇太子少傅楊榮以進上覽之因言國家族屬之盛士奇等請遠法帝堯明峻德以親九族上以爲然孝宗時太常寺少卿兼侍講學士楊時暢進玉牒按宋制於正殿登受前此所未有也

修書

洪武中稽古右文以開至治故纂述之事殆無虛日元年六月命禮部尙書陶凱輯自古太子諸王之嘉言善行爲書旣成上未慊意更令修撰王傑等刪定之二年二月書成凡一百一十餘條爲二卷賜名昭鑒錄又命學士朱升等同本院儒士修女戒是年三月辛未朔書成四年七月存心錄成六年三月宋濂進辨姦錄分賜皇太子親王濂

嘗被命輯自古奸宄之迹爲書至是進呈七年九月孝慈錄成命翰林定服制也十三年五月臣戒錄成先是上命本院儒臣纂錄厯代諸侯王宗戚宦官之屬悖逆不道者二百二十人備其行事以類書之旣成賜今名命頒布中外十四年五月朔編修吳沈典籍劉仲質吳伯宗進千家姓凡爲姓一千九百六十有八十六年二月東閣大學士吳沈等進精誠錄類編聖賢所言三事曰敬天曰忠君曰孝親十八年三月省躬錄成初上命翰林儒臣編集厯代帝王祭祀祥異感應可爲鑒戒者爲書名曰存心錄朝夕觀鑒後復命贊善劉三吾編類漢唐以來災異之應於臣下者別爲一書名曰省躬錄至是成詔頒行之二十一年

九月頒武士訓戒錄亦翰林儒臣所修也二十六年諸司職掌成先是命吏部同本院儒臣倣唐六典自五府六部都察院以下職務類編爲書至是成刊布中外又嘗詔本院稽考漢唐宋功臣封爵食邑多寡及名號虛實等第爲書名曰稽制錄至是亦頒示功臣十二月永鑑錄成頒賜諸王世臣總錄成頒示中外羣臣皆本院儒臣所修也二十七年七月寰宇通志成時上以輿地之廣不可無書以紀之乃命本院儒臣及廷臣以天下道里之數總類爲書復編洪武誌書二十八年十二月成刊行之二十九年十一月頒稽古定制亦翰林儒臣所定勛舊食祿之家禁例禮節也他如皇明祖訓大誥三篇大誥武臣資世通訓御

製詩文御註洪範御註尙書御註道德經皆出宸衷而令
本院儒臣商確之又有志戒錄忠義錄爲政要錄彰善癉
惡錄武臣鑑戒醒貪簡要錄務農技藝簡要錄大率皆翰
林院所修而年月莫考洪武戊寅嘗詔編輯經史百家之
言爲類要侍讀唐愚士等纂修未成永樂元年七月上諭
侍讀學士解縉等曰朕欲悉采各書所載事物類聚之而
統之以韻凡書契以來經史子集百家之書至于天文地
志陰陽醫卜僧道技藝之言備輯爲一書毋厭浩繁於是
廣召四方儒者許侍臣各舉所知至三年正月開局纂修
命太子少師姚廣孝禮部尙書鄭賜監修刑部左侍郎劉
季篪副監修賜卒以贊善梁潛代焉其總裁副總裁纂修

等無慮數百人書成名曰永樂大典元年九月勅諭翰林
儒臣輯自古嘉言善行有益於太子以儲君昭鑑錄爲主
稍充廣之名曰文華寶鑑二年四月書成上御奉天門召
皇太子授焉又命解縉等編次古今后妃諸侯大夫士庶
人妻之事分爲三卷元年十一月進御賜名古今列女傳
上親序之頒之六宮行之天下時庶吉士余鼎輩讀書文
淵閣上命編纂君臣父子諸格言各爲類名曰聖學心法
七年二月書成亦親序之出示學士胡廣等因命司禮監
刊印又以璽書諭皇太子令學士黃淮楊士奇等採古名
臣直言并奏疏彙類以便觀覽十四年十二月書成賜名
歷代名臣奏議遂命刊印以賜皇太子皇太孫及大臣十

六年六月乙酉詔修天下郡邑志書命學士楊榮等總之
戶部尙書夏原吉提調上嘗巡北京以仁宗隨行道途所
經過農家徧覽農具及其衣食且諭以農民勤苦之事曰
此爲帝王者不可不知也遂作務本之訓以授仁宗又爲
善陰騭孝順事實二書以風厲天下雖出御製而本院儒
臣亦與聞焉宣德元年正月乙卯勅修歷代臣鑒外戚事
鑒皆命大學士楊榮總之且諭榮以書館中編纂及繕寫
官有不遵約束者悉聽稽督責罰敢有違越者具聞黜之
榮處之適當人皆悅服○年○月書成頒賜在廷諸臣及
戚畹又詔修五倫書正統十年三月書成景帝時勅修君
鑑及寰宇通志景泰三年五月歷代君鑑錄成七年五月

寰宇通志成英宗復辟以寰宇通志多泛濫勅本院儒臣約爲一統志天順五年五月大明一統志成上親序之憲宗時肇建東宮詔修文華大訓本院官預者惟學士王獻侍講學士楊守陳侍讀倪岳等四人篇目條例多本大學衍義獨事涉中人者悉不以書守陳爭曰是何以爲訓撮其賢否得失之故分註一條議者不能奪成化十八年二月文華大訓成上親授諸皇太子令宮臣進讀宏治十年三月詔修大明會典大學士李東陽焦芳等總之其凡例本諸司職掌而旁及諸制書以官職制度爲綱事物名數儀文等級爲目每有事例因革損益皆詳載焉十五年十二月書成凡一百八十卷上親爲序正德六年四月司禮

太監張永傳奉聖旨命儒臣重加參校十二月大學士李東陽以重校大明會典表上之武宗復爲序始纂修時學士王鏊欲如唐六典之本庶潤色有文簡明易見總之者不能從也一代之制雖云具備然宮中所設職掌皆未詳載豈當時中人之燄方煽與重加改正懸諸象魏以爲法守在今日而已凡進書例有表上其儀見會典

修史

洪武二年二月丙寅朔詔修元史以中書左丞相宣國公李善長爲監修前起居注宋濂漳州府通判王禕爲總裁徵山林遺逸之士汪克寬胡翰宋禧陶凱陳基趙壘曾魯高啓趙汭張文海徐尊生黃箴傅恕王錡傅著謝徽十六

人同爲纂修開局於天界寺取元經世大典諸書以資參
考時方召諸儒考禮於是儒士徐一夔梁寅周子諒胡行
簡劉宗弼董彝蔡深滕公瑛時曾魯輩以元史方成共奏
留之因命與諸儒同纂修九月元史成紀三十八卷志五
十三卷表六卷傳六十二卷濂等表上之惟元統以後尙
缺三年二月乙丑詔續修元史時儒士歐陽祐等采摭元
統以後實事還朝仍命濂與待制王禕總裁儒士趙壘朱
右貝瓊朱世廉王彝張孟兼高遜志李懋張宣李汶張簡
杜寅殷弼俞寅十四人同纂修七月丁亥朔續修元史成
計五十三冊紀十志五表二列傳三十六凡前書未備者
悉補完之通二百十二卷濂等率諸儒以進詔刊行之人

賜白金二十兩文綺帛各二授儒士張宣等官各有差惟趙壘朱右朱世廉乞還田里從之後令解縉還家著述十年乃復來朝因命改修元史之舛謬及踵成宋書刪定經禮凡例皆以留中未幾縉以太祖大喪入朝進香被謫書蓋未成也成化八年十月詔修宋元通鑑綱目十二年十一月成凡若干卷大學士商輅等表上之宏治十六年□月詔修歷代通鑑纂要正德六年□月成凡若干卷大學士李東陽等表上之二書皆上爲序蓋纂修之事必集衆長而後可成正統中南京侍讀學士周敘獨受詔修宋遼金三史未及成書而卒至今猶爲缺典顧此非一人精力所能就雖開局可也

天
訂輯經傳

經書註釋言人人殊自國朝訂輯之而後五經六籍益明於世洪武六年詔修撰孔克表御史中丞劉基秦府紀善林溫取諸經要言以恆言釋之使人易曉因手釋二章賜克表爲例克表等承詔釋義四書五經以上賜名羣書類要聖祖嘗覽蔡氏書傳指謫其可議者二十四年十一月禮部右侍郎張智等奉命同學士劉三吾等會議改正蔡氏書傳并定程文格式頒行天下學校其改正之說曰前元科舉尙書專以蔡傳爲主考之傳內如天文一節已自差謬謂日月隨天而左旋今仰觀乾象甚爲不然夫日月五星之麗天也除太陽則人目不能見其行於列宿之間

下民乃天之事相協厥居乃人君之事天之陰騭下民者何風雨霜露均調四時五穀結實立烝民之命此天之陰騭也君之相協攸居者何敷五教五典以教民明五刑而弼教保祐而和協使強不得凌弱衆不得暴寡而各安其居也若如蔡氏之說則相協之事皆付之於天而人君但宴安自若於奉天勤民之政略不相與又豈天祐下民作之君師之意哉今後當依此說二十七年四月復詔徵儒臣考正蔡氏書傳於是太子少保唐鐸等舉致仕編修張美和國子監博士錢宰等二十七人皆宿儒也並遣行人馳傳徵之既至上語以正定書傳之意且曰爾等知天象乎皆對曰不知上曰朕每觀天象自洪武初有黑氣凝於

奎壁奎壁乃文章之府朕甚異焉今年春其閒黑氣始消
文運始興爾等宜考古正今有所述作而稱朕意於是命
三吾等總其事開局翰林院至九月書成三吾等率諸儒
上進賜名曰書傳會選命禮部刊行天下賜諸儒綺繪衣
物等并御製詩燕享命坐殿中瀕行又賜寶鈔俾馳驛而
還上又嘗謂孟子一書不可泛觀二十二年四月詔集耆
儒錢宰等二十七人命劉三吾總之參訂孟子纂其要語
刪去八十五條至九月書成進御命之曰孟子節文尋又
命三吾訂正周禮上躬與之裁定蓋由聖心沉潛經術既
久故能探蹟詣極以成書永樂十二年十一月甲寅上諭
學士胡廣楊榮金幼孜曰五經四書皆聖賢精義要道傳

註之外諸儒論語議有發明爾等宜采附於下周程張朱諸君子性理之言如太極圖通書西銘正蒙之類皆六經羽翼然各自爲書未有統會卿等宜類聚成編務極精備用垂永久命廣等三人總其事仍舉朝臣及在外教官有文學者同修開館東華門外命光祿寺給朝夕饌甚豐十三年九月己酉書成賜名性理大全廣等表上之上親爲序冠其首詔頒於六部兩京國子監及天下學校按聖祖命劉三吾定科舉取士之制四書義主朱氏集註章句易主程氏傳朱氏本義書主蔡氏傳及古註疏後主會選詩主朱氏集傳春秋主三傳及胡氏張洽傳禮記主古傳疏廣等所定惟四書及易詩如舊書主蔡氏春秋主胡氏禮

記主陳澔集說嘗求其故蓋當時編纂惟據元人四書五經性理會通稍加刪潤而成非爲異也

校勘書史

洪武中本院儒臣校勘書史進御日以爲常蓋聖祖好學手未嘗釋卷故也仁宗在東宮嘗命侍講楊士奇贊善陳濟校讐歐陽修文集正其誤補其闕釐爲一百五十三卷命刻以傳成化中本院官受命校勘資治通鑑綱目貞觀政要二書翻刻以賜在廷大臣正德時命重校大明會典語見前餘多莫考

修書陞賞

凡書成進御例有陞賞酬勞也洪武中修元史及書傳會

選陞賞見前然擢用皆儒臣之未授官者若本院官則賞而不陞蓋以文墨特其職分之常故爾永樂元年六月癸亥太祖皇帝實錄成時侍讀學士解縉於奉天門欽奉聖旨修史官除翰林院及尙書李至剛外其餘官員監生生員人等說與吏部引選發落欽此丙寅吏部將修史郎中等官同儒士監生生員吏部引選詔以郎中等官徐旭等各陞一級儒士監生生員吏員王孟易等除授主事御史中書舍人并都事等官有官者修史得陞擢始見於此於是以吏部郎中徐旭爲國子監祭酒太常寺博士錢仲益知縣楊觀梁潛王袞爲修換國子助教王達給事中朱紘爲編修行人蔣驥爲檢討國子博士金玉鉉爲五經博士

晉府侍讀蘇伯厚爲侍書教諭解榮劉宗平爲待詔靖江
府教授張顯爲國子監學正訓導富貴清羅師程爲國子
監學錄知府劉辰爲江西右參政禮部郎中胡遠爲江西
左參議廣東僉事李燧爲福建左參議僉事葉砥改吏部
考功郎中知州鄒濟改禮部儀制郎中知縣趙季通例應
陞而以疾乞教職授國子博士知縣唐雲改監察御史楚
府教授吳勤改開封府學教授陞膳寫官主事陸暉爲禮
部員外郎端孝思爲兵部員外郎擢監生鍾子勤陳彝訓
劉沈文爲中書舍人梁逢吉葉蕃沈紹先華嵩喬岳衛談
鄭中余從善陳俊良陳實爲監察御史生員金實爲翰林
典籍汪琦等十人爲知縣而纂修儒士王孟易端禮朱逢

吉莫士安陞授莫考以聖詔推其次第蓋授主事云十六
年再重修太祖實錄成改纂修主事李時勉陳敬宗爲侍
講監修以下賜金帛鈔幣紗衣有差太宗仁宗兩朝實錄
吏部據行在翰林院備開修史官員人等姓名具題請旨
奉聖旨曾棨王英王直都陞少詹事支正四品俸仍兼原
兼職事周述陞庶子支正五品俸仍兼原兼職事李時勉
錢習禮都陞侍讀學士余學夔旣告老疾著冠帶回去閑
住陳循蔣驥都陞侍講學士藺從善陞洗馬仍在翰林院
辦事劉永清邗寬胡種都陞侍講蔣禮陞中允仍在翰林
院辦事周敘孫曰恭楊敬都陞修撰王雅等四員都陞編
修陳繼陞檢討張禮陞行人署典籍事沈寅陞正字署孔

日事蔣暉程南雲都陞從四品俸兼翰林院侍書夏衡宣
嗣宗都陞郎中張習蘇鑑王觀陞員外洪益中陞左寺正
邱宗楊珪邵暹陞右寺正蕭湘至胡宜衡陞左評事解禎
期至寇原陞右評事潘文奎他老了著冠帶回去閑住陳
中陞員外陳叔剛陞修撰萬節陞左寺副邱錫還做府學
教授支九品俸梁萼陞府學教授鄒循做翰林院待詔朱
銓做翰林侍書辦事吏翁選至李用都做縣丞欽此蓋自
是本院官始以纂修陞矣然纂修與稽考參對皆混陞又
有令其閑住者實斷自宸衷故也宣宗實錄吏部據行在
禮部開報具題奉聖旨皇考實錄修完特念他每勤勞英
國公於原號加佐理二字歲加祿米百石楊士奇楊榮陞

少師兼職如舊楊溥陞少保兼尚書武英殿大學士欽此
隨又奉聖旨英國公張輔等四員已發落了王直王英俱
陞禮部左侍郎兼職如舊不管部事李時勉錢習禮蘭從
善俱陞翰林院學士苗衷陞侍讀學士曾鶴齡高穀馬愉
俱陞侍讀學士周敘尹鳳岐孫曰恭習嘉言陳叔剛陳恂
俱陞侍讀曹鼐儀銘王一寧杜寧諸懋陞侍讀楊翥董璘
楊壽夫林文鍾復張益邵宏譽俱陞修撰劉球劉鉉洪璵
對品改除侍講俱陞從五品俸胡種邢寬及蕭鎡至靳通
共三十三員俱照本等品級各陞俸一級內有原陞俸的
還照例加俸一級陳循徐理王玉旣丁憂且不陞秀才陳
學等十八名俱授試中書舍人給半俸三年後實授辦事

顏聚等十一名各照原資格除授欽此蓋監修及總裁官
陞擢自此始英宗實錄成吏部據翰林院開報具題奉聖
旨皇考實錄修完念他每勤勞會昌侯孫繼宗陞太傅陳
文陞太子太保兼禮部尚書彭時陞太子太保兼兵部尚
書俱文淵閣大學士劉定之陞工部右侍郎兼翰林院學
士不管工部事吳節陞太常寺卿兼翰林院侍讀學士柯
潛萬安李泰陞詹事府少詹事孫賢劉珣陞太常寺卿仍
兼舊職陳鑑劉吉陞侍讀學士邱濬陞侍講學士黎淳陞
左庶子童緣劉宣陞右庶子王一夔陞左諭德江朝宗楊
守陳陞洗馬彭華尹直陞侍讀彭教徐瓊陳秉中李永通
陞侍講耿裕鄭環劉健汪諧吳鉞羅璟陞修撰周經陞編

修張元禎既告病罷李東陽倪岳謝鐸焦芳陳音程敏政
吳希賢馬麟焦珣李溥凌暉蔚宣黃清劉詢俱陞俸一級
余謙陞太常寺卿林章陞太常寺少卿吳謙陞從四品散
官并俸韓定何暹葉玟陳綱王瓊陞本司郎中王佐白直
陞通政司知事毛顯陞司寶署丞冀舞陞大理寺評事高
鑑陞戶部照磨監生史盛等九名除從七品京職譯字官
并生員秀才胡清等十二名俱除序班辦事吏曹昂等九
名俱照原資格除授事故的罷欽此蓋是時總裁官少保
吏部尙書兼華蓋殿大學士李賢副總裁官禮部右侍郎
李紹纂修官侍讀學士周洪謨左春坊左庶子王璵右春
坊右庶子兼侍讀徐溥侍讀李本修撰岳正邢讓王獻謄

錄官吏部員外郎凌耀宗禮部員外郎謝宇中書舍人溫
良劉琪鴻臚寺司儀署丞潘致中序班梁俊周景各以事
故去猶具姓名上故有此旨憲宗實錄成吏部據本院除
事故不開外將見在開報具題奉勅吏部皇考實錄修完
念他每勤勞監修張懋陞太師仍兼太子太師總裁劉吉
陞少師華蓋殿大學士餘兼如故徐溥陞太子太傅戶部
尚書兼武英殿大學士劉健陞禮部尚書兼文淵閣大學
士副總裁邱濬陞太子太保仍兼禮部尚書汪諧陞禮部
右侍郎兼翰林院學士如勅奉行欽此又二日奉聖旨監
修總裁張懋等俱已陞了纂修官傅瀚陞太常寺卿費閏
陞詹事府詹事俱兼侍讀學士李傑已陞官了仍加俸一

級李東陽同董越陞太常寺少卿謝遷吳寬陸簡少詹事
俱兼侍講學士曾彥楊守陞左諭德劉戩王鏊右諭德楊
傑梁儲司經局洗馬張元禎南京翰林院侍讀學士劉機
楊廷和江瀾俱侍讀武衛張芮劉忠鄧焮黃珣張天瑞俱
侍講楊時暢劉春涂瑞俱修撰謄錄等官林章龍暹各陞
俸一級馬紹榮太常寺少卿姜立綱太僕寺少卿季通王
文琮俱本司郎中王佐王璉員外郎陸華主事俱工部毛
顯大理寺右寺副吳穀周文通陞俸二級黃璘燦大理寺
左寺副吳榮劉棨右寺副胡清徐鶚左右評事黃燦胡清
仍加一級俸李瑄光祿寺署正王臣通政司經歷靳塘蔡
振光祿寺署丞何澤朱賓楊全試中書舍人劉安劉學陳

倫戶部照磨吳孜翰林院典籍以上官仍照舊辦事原加俸一級者照舊加之張翰陞侍書仍管孔日事監生九名除從七品京職辦事吏八名照舊資格除授欽此孝宗實錄成吏部查事例具題奉聖旨這修實錄官員會修大明會典陞過的及丁憂未陞的都查職銜并腳色到館年月日期開寫明白來看欽此行准翰林院手本開坐具題節奉聖旨這纂修實錄重事你吏部便照例擬陞職等例來說欽此隨於奉天門欽奉勅吏部皇考實錄修完念他每勤勞監修張懋加賞大紅紵絲蟒龍一表裏總裁李東陽加支正一品俸焦芳加少師兼太子太師華蓋殿大學士楊廷和加陞俸二品副總裁梁儲陞授本部尙書餘如舊

如勅奉行欽此續該本部將纂修官員等各酌量厯俸并到館淺深查照往年纂修陞職事例擬陞相應職俸通行開坐具題節奉聖旨纂修催纂侍讀毛紀等十八員并收文書劉訊瞻錄沈冬魁等七員俱陞一級稽考參對修撰呂枏等十二員陞俸一級喬宗及秀才張保等二十九員名細開因何入館年月日期來厯腳色務查明白來訖不致乖方丁憂起復官生劉春等二十二員名還查到館年月日期來訖欽此於是吏部復將入館來厯緣由并具題有旨以營求入館貪圖陞賞又保送來厯不明責之喬宗等對品調外任有差而侍讀吳一鵬等皆陞調兩京部屬時逆瑾扇虐惡諸翰林不爲禮屈焦芳劉宇輩又嗾之謂

文士不習世故摘所同忌者十餘人以擴充政務爲名故有此舉非武宗意也而憂居者如侍讀徐穆編修賈詠等猶不免一鵬調南京刑部員外郎穆調南京禮部員外郎詠調兵部主事董玘調刑部主事穆孔暉調南京禮部主事餘各有差及瑾誅諫官以爲言乃俱復官正德五年八月也會內閣以本院及坊局多闕員乃疏其有資望者以次陞補喬宗等則本院以善楷書保留云蓋自纂修以來陞賞事例至是大紊矣復先朝之彝典將有望於今日若乃賞賚按永樂元年五月乙未上以太祖實錄將成命禮部預定賞格禮部以修元史賞例進上覽之曰此述前代興亡之迹今朕紀皇考神功聖德貽範萬世豈可比而同

之爾擬議非倫矣遂親定監修官銀百兩綵幣六表裏織
金紗衣一襲鞍馬一副總裁官銀八十兩綵幣五表裏織
金紗衣一襲鞍馬一副纂修官各銀五十兩綵幣四表裏
紗衣一襲催纂兼謄寫官銀二十兩綵幣三表裏紗衣一
襲催纂官銀二十五兩綵幣二表裏紗衣一襲謄寫監生
生員儒士各銀十兩鈔三十錠綵幣一表裏謄寫吏各銀
八兩鈔三十錠綵幣一表裏催督謄寫者鈔三十錠絹二
疋辦事例吏各鈔二十錠絹二疋六月辛酉景隆等八十
六人如賞格受賜其後太宗仁宗兩朝以至英宗實錄成
皆爲例獨憲宗實錄成視前或微不同宏治四年定賜監
修并總裁官銀八十兩綵段四表裏羅衣一套鞍馬一副

總裁官銀八十兩綵段四表裏羅衣一套纂修官銀三十
兩綵段四表裏羅衣一套催纂官銀二十兩綵段二表裏
羅衣一套謄錄官銀十五兩綵段一表裏辦事吏典鈔二
十錠絹一疋各色人匠鈔二十錠布一疋官陞擢事故去
任及監生事故去者久近不一賞賚有差乃若修他書宣
德以前不過白金文綺襲衣寶鈔之賜而已正統以後始
有陞擢而賞賚則視實錄稍殺焉

東宮纂修

洪武十二年八月東宮文學傅藻等受皇太子命編輯春
秋諸國君臣行事始終書成皇太子以聞上賜名曰春秋
本末永樂中東宮命楊士奇徐善述等編纂大易等直指

語見前卷其後東宮纂修蓋無聞焉

翰林記卷第十三

翰林記卷第十四

嶺南遺書

香山黃佐才伯撰

殿試讀卷執事

會典云凡殿試讀卷官內閣於大學士學士等官內具名
從該部奏請至日與各衙門該讀卷官詳定試卷次日同
赴文華殿內閣官將第一甲三卷以次進讀俟御筆批定
出將二甲三甲姓名填寫黃榜又次日早同赴華蓋殿內
閣官進至御座前以次拆卷將姓名籍貫面奏司禮監官
授制勅房官填榜畢開寫傳臚帖子內閣官捧榜出至奉
天殿授禮部尚書制勅房官將帖子授鴻臚寺官傳臚其
受卷彌封掌卷官從內閣於本院及春坊等官并制勅房

官內推選與各衙門官相兼執事本院坊局始不過五人後增至七人遂爲例按讀卷官國初用祭酒修撰等官正統中侍講猶與其後非執政大臣不得與而其去取之柄則在內閣殿試之明日大學士擇其中優者三卷圈點以硃明日早持詣文華殿對上讀之御筆親標其名第又明日卽傳臚矣蓋讀卷止在一日咸病其太亟不能徧觀故本院坊局之執事者始得試卷時預鑒別其高下爲差等以付讀卷官內閣乃易於裁定葉盛曰景泰二年予爲殿試彌封官最知讀卷事第一甲蓋閣老預屬意於受卷官已皆知之餘皆分送讀卷諸大臣且率以三分上一等次二等各置一所少頃閣老收上一等則判二甲次二等則

判三甲也將午三人者持一甲卷詣文華進讀午後填黃
榜明早榜出矣蓋辰巳二時榜中人第已定若曰須一一
品量高下次第固有所不能也盛所謂預屬意云者豈有
爲而發歟

殿試擬撰策問

聖祖策進士多親製策問洪武四年十八年皆然其後或
命本院儒臣擬撰以進取自聖裁而用之永樂初科太宗
思求博聞之士命學士解縉擇天文律厯禮樂制度擬撰
爲題上意士子必爲所窘及得曾棨卷記誦詳盡歎異以
爲第一人御筆批曰貫通經史識達天文有講習之學有
忠愛之誠擢魁天下昭我文明尙資啓沃惟良顯哉其第

二人周述第三人周孟簡亦皆批評前此所未有也聞之
李賢謂縉嘽劉子欽先以問目示桀桀遂獲首而寘劉子
欽二甲果爾則縉不可以言無私矣

考會試

凡會試考試官禮部奏行內閣於大學士學士等官及詹
事府各坊司經局官內具名請奏欽命其同考官於本院
侍讀等官及春坊司經局官與各衙門官相兼推選收掌
試卷官用制勅房官一員按國初科舉第一場問四書題
一道五經義各一道第二場論一道詔誥章表內科一道
第三場策一道猶循元制也洪武四年會試陝西河南山
東江西湖廣廣東廣西福建爲行中書者十一俊髦皆集

而高句麗之士與焉以禮部尙書陶凱與前侍讀學士潘
廷堅爲主司侍讀學士詹同國子司業宋濂吏部員外郎
原本前貢士鮑恂爲同考取中式者俞友仁等一百二十
人落第者惟八十人其後罷之十八年復以科舉取士始
定今制以待詔朱善前典籍聶鉉爲試官取中式者黃子
澄等四百七十二人二十一年取施顯等九十五人二十
四年取黃觀等三十二人二十七年取彭德等一百人三
十年取宋琮等三十八人北士皆黜學士劉三吾爲考試
官竟以是獲罪上乃命本院官考擇下第北士六十一人
廷試之語見覆試類革除庚辰科禮部左侍郎兼學士董
倫侍講學士兼太常寺少卿高弼志爲考試官取吳溥等

真本言卷第一四
一百一十人永樂二年侍讀學士解縉侍讀黃淮爲考試
官取楊相等四百七十二人遵洪武乙丑例也蓋自是取
士多寡臨期請自上裁云四年取朱縉等二百二十人七
年取陳璠等一百人十年左諭德兼侍讀楊士奇右諭德
兼侍講金幼孜爲考試官取林志等一百人十三年修撰
兼右贊善梁潛爲考試官取洪英等三百五十人十六年
侍講曾棨爲考試官取董璘等二百五十人十九年左春
坊大學士楊士奇爲考試官取陳中等二百人二十二年
侍讀學士曾棨爲考試官取葉恩等一百五十人宣德二
年右春坊大學士曾棨爲考試官取趙鼎等一百人自設
科以來兼取南北士而南士往往數倍於北宣宗卽位始

詔禮部歲取百人南士什六北士什四著爲令旣而以百
乘除又各退五爲中數焉五年侍讀學士李時勉侍讀錢
習禮爲考試官取陳詔等一百五十八人八年少保兼大學
士致仕黃淮爲考試官取劉哲等一百人正統元年少詹
事兼侍讀學士王直侍講學士陳循爲考試官取劉定之
等一百人四年禮部左侍郎兼侍讀學士王直學士藺從
善爲考試官取楊鼎等一百人七年禮部左侍郎兼侍讀
學士王英侍讀學士苗衷爲考試官取姚夔等一百五十
人十年學士錢習禮侍講學士馬愉爲考試官取商輅等
一百五十八人十三年工部右侍郎兼侍講學士高穀侍講
杜寧爲考試官取岳正等一百五十八人景泰二年戶部右

侍郎兼學士江淵脩撰林文爲考試官取吳滙等二百人
同考試官有侍講劉儼秩視脩撰爲高蓋儼科第後於文
故也五年兵部左侍郎翰林院學士兼左春坊大學士商
輅司經局洗馬兼脩撰李紹爲考試官取彭華等三百五
十人天順元年學士薛瑄通政司右參議兼侍講呂原爲
考試官取夏積等三百人四年學士呂原尙寶司少卿兼
修撰柯潛爲考試官取陳選等一百五十人是科會試舉
子不中者奏考官校文顛倒宜正其罪上疑之召問李賢
賢對曰此乃私忿考官實無此弊如臣弟讓亦不中可見
其公上意方回乃命禮部會翰林院考此舉子驗其學多
不能答題意且奏其狂妄遂枷於部前以示衆羣議方息

七年學士陳文尙寶司少卿兼修撰柯潛爲考試官場屋
災詔八月補試以太常寺少卿兼學士彭時侍讀學士錢
溥爲考試官而同考試官不改命者修撰王獻也取吳鈇
等二百五十人成化二年太常少卿兼侍讀學士劉定之
學士萬安爲考試官取章懋等三百五十人五年太常寺
卿兼侍讀學士劉珣侍讀學士劉吉爲考試官取費閭等
二百五十人八年禮部左侍郎兼學士萬安司經局洗馬
江朝宗爲考試官取吳寬等二百五十人十一年少詹事
兼侍講學士徐溥侍讀學士邱濬爲考試官取王鏊等三
百人十四年禮部尙書兼學士劉吉學士彭華爲考試官
取梁儲等三百五十人十七年太常寺卿兼學士徐溥少

詹事兼學士王獻爲考試官取趙寬等三百人二十年詹
事兼學士彭華左庶子劉健爲考試官取儲巵等三百人
時有世家子在選朱墨卷不合華黜之矢志者欲甘心焉
卒亦無所害二十三年守臣有言中士日衆而額如故者
事下禮部集議南北仍各退二以益之太子太保兵部尙
書兼學士尹直右諭德吳寬爲考試官取程楷等三百五
十人宏治三年禮部尙書兼文淵閣大學士徐溥少詹事
兼侍講學士汪諧爲考試官取錢福等三百人六年太常
少卿兼侍講學士李東陽少詹事兼學士陸簡爲考試官
取汪俊等三百人九年詹事兼侍講學士謝遷侍讀學士
王鏊爲考試官取陳瀾等三百人十二年太子少保禮部

尙書兼文淵閣大學士李東陽掌詹事府事禮部右侍郎兼學士程敏政爲考試官取倫文敘等三百人時敏政有異議同考試官給事中林廷玉發其事戶科給事中華景劾之敏政遂得罪十五年吏部左侍郎兼學士吳寬侍讀學士劉機爲考試官取魯鐸等三百人十六年掌詹事府事太常寺卿兼學士張元禎左春坊大學士兼侍讀學士楊廷和爲考試官取董玘等三百人正德三年少傅兼太子太傅戶部尙書武英殿大學士王鏊掌詹事府事吏部尙書兼學士梁儲爲考試官取邵銳等三百五十年六年少傅兼太子太傅吏部尙書武英殿大學士劉忠掌詹事府事吏部右侍郎兼學士靳貴爲考試官取鄒守益等三

百五十人九年少傅兼太子太傅吏部尙書兼謹身殿大學士梁儲學士毛澄爲考試官取霍韜等四百人十二年太子太保戶部尙書兼武英殿大學士靳貴少詹事兼學士顧清爲考試官取倫以訓等三百五十人十五年禮部右侍郎兼學士石瑄侍講學士李廷相爲考試官取張治等三百五十人蓋會試去取在各房同考試官而參定高下則考試官柄之歷朝應用不同與凡取士多寡皆不可不知故備記始此若同考試官正統以前猶參用外官敎職景泰後始純用京職內則本院外則六科部屬行人司官宏治以來定本院官九人餘惟六科部屬得與共十四人正德辛未以易書詩房卷浩繁各增其一本院官十一

人與六科部屬共十七人云按國朝以文取士大槩以詞
達爲本天順閒晚宋文字盛行於時如論學繩尺之類士
子翕然宗之文遂一變侍講學士邱濬每考試凡恠詞險
語皆痛斥之怨排不恤也及爲祭酒尤諄諄爲學者言之
文體乃復渾厚成化乙未會試學以至乎聖人之道論舉
子桑悅卷有我去而夫子來也等句濬黜之他日會試悅
策有曰腹中有長劍日日幾回磨檢討吳希賢復黜之前
輩取士不苟如此

覆試

洪武三十年丁丑六月辛巳朔上御奉天殿策試下第舉
人先是禮部會試者多而中式者少被黜落者咸以爲言

上命翰林儒臣考下第卷中擇文理優長者得六十一人
至是復廷試之擇韓克忠爲第一仍賜克忠等進士及第
出身有差乙酉以克忠爲修撰第二人王恕第三人焦勝
爲編修七月命太常寺丞張顯宗署國子監祭酒事因命
克忠署司業事其見寵擢如此永樂二年上臨軒策士傳
臚之明日進會試所選副榜士於廷親試之上御右順門
命侍讀學士楊士奇金幼孜諭旨令就試者從容盡所蘊
無苟且取具命光祿給食中官夕給燭遂親拔三人命進
學翰林餘第爲二等付吏部除學官其第一人則周翰也
預修永樂大典七年除典籍云按宣德間副榜舉人得冠
帶讀書太學蓋循此制然不可考正統後副榜始不復廷

試矣揚士奇云宣德丁未以前有十五科前此南北士合
試未有北士占首選者有之實自丁未始猶不數覆試之
王直云自洪武辛亥至正統丙辰爲二十科則并韓克忠
一榜數之也

考兩京鄉試

凡順天府應天府鄉試本府以考試官請命與會試同蓋
重畿甸以爲天下先也按洪武庚戌京闈主考爲前御史
中丞劉基侍書御史秦裕伯同考爲侍讀學士詹同宏文
館學士睢稼起居注樂韶鳳尙寶丞魏潛國史宋濂辛亥
京闈主考則兵部尙書吳琳國子司業宋濂也永樂癸未
命侍讀胡廣編修王達爲應天府考試官賜宴於本府自

是遂爲例正統戊午侍讀學士曾鶴齡主考順天府鄉試
初試之夕場屋火試卷有殘缺者有司懼罪不敢以更試
爲言惟欲請葺場屋以終後兩試鶴齡曰必更試然後百
弊滌至公著不然雖無所私亦招謗朝廷何惜一日之費
以成此盛舉哉有司具二說以進命下悉如鶴齡所言衆
皆愧服得士亦審景泰丙子洗馬柯潛奉命主考應天府
鄉試舟維淮陽有舉子鬻私者暮夜投潛潛叱之彼固以
請以所賂遺置前潛怒命執付有司懲以法成化甲午左
庶子黎淳主考順天府鄉試有試卷甚奇後不類疑有弊
勾稽墨卷果得謄錄生截卷狀移簾外按其事而取是卷
爲解首則名士馬中錫也此三事皆可爲應變之法景泰

庚午侍講學士劉鉉主考順天府及揭曉第一人劉宣乃
盧龍軍士也同事者欲更之鉉爭曰朝廷立賢無方不可
乃止時論躉鉉丙子順天府主考爲右春坊大學士劉儼
侍講學士呂原時少保兼大學士陳循王文用事循子瑛
文子倫入試俱不中二人論奏儼原不公有旨令翰林并
科道覆考試瑛倫文字遂以爲合格得特賜舉人儼等問
罪還職禮科給事中張寧劾奏循等罪狀乞黜不報未幾
英廟復辟文誅循戍鐵嶺瑛倫皆爲民此科試之大變也

試錄程式文字

國朝鄉試小錄會試錄進士登科錄具有成式蓋科舉自
兩京外鄉試付之藩臬以爲未信也會試則以名籍付禮

部考試付翰林暨於親試則有殿最而無黜陟蓋以爲可信矣其所刻程文自鄉試以至於殿試皆宜刻士子所作文庶爲傳信流弊之極至於制策亦多代筆豈所以教之忠歟按洪武甲子鄉試及乙丑會試初爲小錄以傳然惟列董事之官試士之題及中選者之等第籍貫經籍而已其錄前後雖有序然猶未錄士子之文以爲程式也次科戊辰年始刻程文自是遂永爲定式但此後五科其開命官列銜尙或隨時不一永樂以後其制始一定而不更易矣然永樂中各省鄉試猶有儒士主考官同考者其序文亦不拘篇數景泰中序文禁稱公考官上用實授教官序惟前後二篇以兩京爲法也然兩京序文稱臣獨與會試

同云按初場例出四書義三道正統元年會試出大學論語中庸而不及孟子十年會試出中庸大學孟子而不及論語成化元年順天府鄉試出論語二道孟子一道而不及大學中庸其後定大學中庸內量出一道論語孟子各出一道遂爲例二場洪武四年以禮樂論爲題其後止用經書聖製書中成語三場策問前輩惟以經史疑難及國家之大者言之其後始有出於經史之外併及瑣屑隱僻若序文則宏治五年順天府鄉試猶具歲月後皆不然也葉盛曰文衡之任亦難矣言語文學不足以變士習服士心亦漫浪爲之耳正統己未會試王柳庵主考試第二名張穆兵馬策其原卷起語云兵所以衛民也非兵無以安

夫民之生馬所以資兵也非馬無以足夫兵之用會試錄云兵以衛民非兵無以安民生馬以資兵非馬無以足兵用兩句減去八字柳庵筆也自是舉子以造語簡嚴典重爲尙然柳庵又稱永樂辛丑楊文貞公司會試文衡務先典實之作以洗浮腐之弊最喜曾鶴齡諸作多梓行之至今評程文者以是科爲最蓋洪武永樂閒程文體皆渾厚不特是科而已誠宜錄出以正文體而變士習至若登科錄永樂甲申二甲刻所對策十餘篇其後惟刻首甲三人所爲者正德三年二甲第一人三甲第一俱刻策事出焦芳輩非制也燕對錄曰正德六年四月十三日講畢復召至煖閣叩頭畢上手取會試錄一本付司禮監太監張永

授臣東陽等內有白紙票粘於紙上者三皆指摘所刻文字錯誤處上曰今欲別有施行但念衙門體面恐不好看但與先生輩知之耳臣東陽捧錄叩頭出至煖閣門外留寘案上永令內臣送至內閣是年大學士劉忠累疏辭疾未允強起主考試事出院後卽乞省墓已得請是日陛辭聞此事而去比抵家復具疏乞休致蓋已有先入之說矣科舉文字不獨關係氣運而儉人投閒一至於此誠不可以不慎也

考武舉

凡武舉第三場考試官兵部命如兩京鄉試之制正德三年始刻錄前後有序賜會武宴一如文試九年十二年亦

如之惟十五年兵部尙書王瓊變其制止用策一道刻文
三篇本院官一員并兵部公侯伯皆爲考驗官今照舊規
出策二道論一道云

考選庶吉士

考選庶吉士始自洪武乙丑迨永樂初益重其事然其詳
不可考大率每科必選宣宗時合三科進士親試之拔二
十八人爲庶吉士如甲申之制正統丙辰上親考選庶吉
士於文華殿取蕭鎡等十二人已未以後罷之至戊辰始
純選北方及蜀士爲庶吉士被選者萬安等二十人親試
也自是其事付內閣例取平日所爲詩文或繙閱殿試卷
兼採名實行禮部使人延請至東閣前會同吏部試以古

文暨詩各一篇合格者改送本院讀書景泰辛未選吳滙等二十五人甲戌選邱濬等十八人皆兼選南北士天順庚辰三月英宗御文華殿召李賢諭曰永樂宣德中常選庶吉士教養待用今科進士中可選人物端重語音正當者二十餘人爲庶吉士止選北方人若南方人有似彭時者方許選取賢出以語時疑賢欲抑南人故爲此語因應之曰立賢無方何分南北賢曰果上意也奈何已而太監牛玉復傳上命如前令內閣會吏部同選時對牛曰南方士豈獨時比優於時者甚多也牛笑曰且選來看是日考選取十五人南方止三人而江西惟張元禎得與焉天順甲申選李東陽等十八人自是皆兼選南北士成化丙戌

選林瀚等二十四人已丑選費閻等十五人戊戌選梁儲
等二十八人丁未選程楷等三十人宏治癸丑選顧清等
二十八人是科清等已發各司觀政後乃得旨取各司考
選丙辰選顧潛等二十人壬戌選胡煜等二十人乙丑選
崔銑等三十人正德辛未選許成名等三十三人丁丑選
汪佃等三十四人辛巳選廖道南等二十四人天順以前
一甲三人與庶吉士同讀書成化後久廢至宏治丙辰始
復舊規自後皆因之

敎書

洪武中宋濂永樂初解縉皆常領庶吉士特與之講究爾
未嘗抗顏爲師也宣宗時親敎庶吉士考其文藝與永樂

時同至正統戊辰乃顓命詹事兼侍讀學士劉鉉祭酒王
珣教書自後以爲例內閣於學士及詹事府坊局等官擇
資望深者二員請旨送本院教書謂之開館是日自內閣
而下皆釀金爲燕會云

考保舉諸科

凡各處舉到經明行修懷才抱德之士宣德以前送本院
考試後止令吏部考又其後諸科亦廢正統十四年詔各
處舉到儒士照永樂年間事例送本院嚴加考試選用不
中者發原籍爲民葉盛曰永樂中清江俞行之以文學舉
試記里鼓正統中馮益試事道皆不知所謂莫能措一辭
所謂名浮於實君子弗貴者歟如復諸科考藝觀德付諸

翰林可也

考歲貢生

洪武十六年二月丙申命天下學校歲貢生員時諫官有言命禮部榜諭天下府州縣學自明年爲始歲貢生員各一人正月至京從翰林院試經義四書義各一道判語一條中式者入國子監不中者罰之故有此命也會典曰凡考試歲貢生員禮部奏請出題本院官赴內閣領題試畢送卷本部官批定去取送部奏請施行嘗聞編修張元禎考校精覈歲貢士鮮入格者時服其公云

考教職

會典云凡考試願就教職舉人監生吏部奏請出題本部

官赴內閣領題試畢送卷本院官批定中否送部奏請施行又云凡各處儒學訓導九年考滿吏部出題考試初場四書本經義各一道二場論策各一道印封文卷送內閣委本院官批定去取送部奏請施行

考汰官吏

洪武二十九年四月命本院官會同禮部考國子監六堂師弟子甄別高下送吏部以次錄用其後不知何時遂廢永樂中有詔汰在京諸司冗官左贊善陳完時掌春坊事卽操筆書某當留某當去衆皆服其明決然此後亦不聞焉會典云天順八年奏准吏部都察院會同內閣考察在京五品以下文職并在外布按二司官有不公者許令科

道官指實劾奏又云宣德七年勅吏員三考滿當授官者吏部通引於內府會同六部都察院翰林院堂上官出題南北類試其文義粗曉行移得當書札不謬三事俱可取者爲一等二事可取者爲二等俱不可取者放回爲民當差可齋雜記云東閣爲翰林官會揖處一日各部堂上官會考三考吏來集閣下諸同寅遂聯步而出時周修撰旋口誦兩句云爾來閣下考三考我去家中眠一眠語雖戲而對亦切蓋當時考吏必集閣下於此可見

清理武官貼黃

會典云凡兵部清理武官貼黃奏請命學士等官一員同該部及法司堂上官於闕右門清理本院官專管換述

考就試軍士

會典云凡該繼軍下告願科舉者兵部奏送本部出題考試批定中否送本院施行按景泰元年盧龍軍士劉宣宏治五年府軍前衛軍士姚學禮皆發解第一然則軍士中不可謂無人要在甄鑒之爾

稽考監生課簿

會典云凡國子監生課簿按月送內閣稽考

稽考精微文簿

精微文簿所自置始不可考按永樂元年司禮監請如舊制鑄出入精微印從之則是廢而復置也會典云凡五府六部都察院等衙門關給內府精微文簿開寫日行事務

註銷前件按月奉送本院稽考年終類送司禮監交收

稽考四夷館課程

洪武十五年命侍講火原潔等編華夷譯語以元無文字但借高昌之書制蒙古字以通天下之言至是乃命原潔與編修馬亦黑以華語譯其語天文地理人事物類服食器用靡不具載復取元祕史參考紐切諧音旣成刊行之譯字官隸本院蓋始於此二人蒙古產也永樂中上選太學生年少者習四夷諸番字諸生多不欲輒生謗議上怒將罪之學士楊榮力救得免遂命榮掌之榮訓勵得宜自是帖服率皆有成有官至五六品者會典云凡四方番夷翻譯文字永樂五年設四夷館內分八館曰韃靼女直西

番西天回回百夷高昌緬甸選國子監生習譯宣德元年兼選官民子弟委官爲教師本院學士稽考課程後內閣委官提督宏治初奏准科目出身四品以上二員提督其官生公會按月從本院印給仍繳送稽考及食糧授職從吏部禮部奏會同內閣出題考試中否仍從該部奏請施行凡四夷館習譯監生子弟舊例月支米一石會官考試一年通習者與冠帶全不通者黜退正統元年奏定考中一等者冠帶爲譯字官又一年再考中授職宏治三年奏准子弟不許別圖出身三年後考中食糧月給米一石又三年考中冠帶爲譯字官又三年考中受序班職事初試不中者許再試三試不中者黜爲民監生初入館照坐監

朝林記卷第一
例食糧三年考中食糧一石家小糧仍舊又三年考中冠帶又三年考中授從八品職事三試不中者送回本監別用其曾習者非精通譯字不准應試按自後提督官例用太常寺卿及少卿而景泰天順閒譯字官多有取進士者甲申庶吉士劉淳景泰庶吉士吳禎皆自譯字官發身云

考校僧道

洪武十年九月令僧徒皆通般若心經金剛般若經楞伽經命學士宋濂考校之不通者令還俗二十四年六月用翰林儒臣議命禮部清理釋道二教凡府州縣寺觀雖多但存其寬大可容衆者一所併而居之毋雜處於外與民相混餘寺觀爲叢林以居貧民宣德九年僧道行童請給

度牒者甚多命僧道官取勘禮部同翰林院官禮科給事中及僧道官考試能通大經給與度牒景泰閒三年一度僧至數萬天順初如期來集大學士李賢言於上曰此輩有損無益宜令十年一度上從之著令按僧徒之盛莫甚於今日而道流次之蠹國侵民宜事沙汰考校僧徒宜如洪武中所定三經道士則老莊列三子可也試使儒臣定議通行天下委風憲官考校中者宜分府州縣酌量其數而差等之不中者勒令還俗所居惟併爲一所餘皆拆毀爲叢林以居貧民一如洪武二十四年之例是不惟於國家風化有益而所謂釋與道者亦自不違其教矣聖君在上賢公卿在下必有以處此者

翰林記卷第十四

翰林記卷第十五

嶺南遺書

香山 黃 佐 才伯撰

齋詔用寶

國初置承勅監洪武九年以編修吳昇爲承勅監令周孟東爲監丞使齋奉制勅爲職尋罷之其後凡朝廷大禮頒詔天下本院官先撰詔文請旨裁定付中書舍人書寫尙寶司用寶畢行禮之日百官出承天門外肅俟鴻臚寺官唱頒詔內閣官一員捧詔自奉天殿左門入至華蓋殿候駕興捧出至奉天殿授於禮部尙書其他制勅用寶時或不同皆內閣臨時制宜取自上裁葉盛云嘗見勅內閣楊學士蓋勤民之璽皇太后遺詔蓋宏德昭順之寶皇后制

書蓋厚載之寶詔書制諭羣臣誥命皆制誥之寶近年詔書蓋皇帝之寶云始於學士李賢勅命勅諭皆勅命之寶又嘗見正統中手摺印本勅諭蓋廣運之寶朝覲勅諭亦手摺印本蓋敬天勤民之寶勅則蓋廣運之寶勅今皆謂勅書蓋手勅耳惟景泰初勅諭亦蓋廣運之寶或曰以失守重造未成故爾遣勅於外皆黃紙外封用三圖書其文曰丹符出驗四方今則具有成規矣

上寶冊

凡上尊號尊諡皆本院撰擬寶冊文以進洪武初追尊四廟爲帝后學士陶安朱升等捧冊文至御前上親受之永樂初上太祖高皇帝孝慈高皇后諡議上親覽畢親舉諡

議付本院撰文及上諡冊一如洪武時天順二年二月上
聖慈壽皇太后尊號內閣捧寶冊文進上與親覽畢乃行
禮時詔告天下詔草已進訖大學士彭時謂李賢曰此事
前所未有宜有恩典及人賢曰先年已兩赦矣恐數赦非
宜時曰非赦也但行優老之政耳欲令朝官父母年七十
者與誥勅百姓年百歲者與冠帶是所謂老吾老以及人
之老也恩典如此斯與所上徽號相稱矣賢曰善遂共擬
仁政數條進呈上大悅卽命行之頒徽號詔畢上御文華
殿召賢等三人者近前賜銀兩表裏有差仍親自授與和
顏慰勉其鼓舞臣下有如此蓋上尊諡尊號皆人君事親
之禮議冊旣已躬親授受雖賞賚亦必親焉列聖之孝敬

信乎度越千古也

扈從

凡車駕所在近侍諸臣皆扈從洪武中官無定員永樂六年定巡狩親征先詔告天下扈從用本院內閣官三員侍講修撰典簿等官六員書制勅秀才八人譯寫四夷文字監生十三人車駕將發燕羣臣賜扈從官軍人等寶鈔會典云凡駕詣郊壇或巡狩行幸親征內閣官扈從制勅房官隨行書辦遇有勅旨卽時撰寫永樂七年正月車駕巡狩北京學士胡廣諭德楊榮金幼孜及修撰王英等扈從賜綿衣狐裘鞍馬榮時有母喪特畱之三月抵北京賜廣等宴榮辭以憂弗與特命中官以珍饌送之八年二月上

親征虜酋本雅失里等三人仍扈從賜衣被鞍馬途次命
光祿寺給酒饌七月車駕至臚胸河遣榮先歸報皇太子
至京皇太子賜鈔幣金織麒麟衣服銀相縷花香帶及石
刻蘭亭記兩賜宴於翰林命隆平侯張信尙書蹇義款待
且命諸儒臣陪之八月抵北京賜綵幣鈔米羊酒等物十
月榮與廣等扈駕南還賜鞍馬綿衣袴襪及路費途中屢
賜珍饌嘉果抵京賜廣等鈔帛有差十一年正月復巡北
京遂征虜寇廣等三人偕修撰王直梁潛扈從賜衣被鈔
果等物十二年三月親征瓦剌時皇孫侍行上命廣等三
人凡行宮有暇卽與講析義理開其聰明十四年復扈從
南還賜廣等綿衣鞍馬鈔幣十五年三月壬子車駕復巡

北京三人者復扈從上屢問民情榮等悉以實對賜白金鈔幣金織紗羅紵絲衣服等物二十年二月上北征惟幼孜與侍讀王英扈從賜鞍馬鈔幣至濶欒兒海五月遂還英嘗奏事上喜謂曰秀才是二十八人讀書者朕需爾爲用正好宣力勿憚勞苦今凡軍中一切動靜或謠言之類爾有所聞卽來奏又諭太監孟驥曰秀才有事卽令人見毋阻二十年三月戊寅大學士楊榮金幼孜從征沙漠賜米鈔鞍馬令榮等參預軍中機務時召榮幼孜於御幄中同公侯大臣坐飲凡有賜賚或公侯不與俱或與公侯俱而扈從文臣不與焉九月宴隨征將士命榮幼孜坐前列食上肴賜鈔幣并上品織金襲衣鞞鞞二十一年七月榮

扈從西征賜羊酒帳房等物八月庚申駐師萬全一應軍務悉命榮掌之晝夜或三接五接每以楊學士稱之不名十月次天成番王也先土千納款命榮往受之回賜御饌慰勞備至十一月旋師賜鈔一萬貫米十石紵絲織金衣二襲靴鞮二雙二十二年復北征榮與幼孜扈從語見受顧命類宣德元年漢庶人高煦反榮勸上親征遂與楊士奇從行討平之日七月駕還賜榮等鞍馬白金鈔幣及樂安州男女五十餘人三年八月戊申車駕巡邊獨榮扈從九月癸丑給與內廐良馬命榮先從出塞日賜御廚酒饌乙卯師次寬河報捷丁巳駐蹕會州甲子班師五年二月乙未上侍皇太后謁長陵大學士楊士奇楊榮等扈從庚

子上以皇太后命召見士奇等五人於行殿諭之曰皇帝
數言卿等忠勤今天下清寧民生無事是固祖宗福佑家
國亦惟卿等贊翼之功賜以酒肴及白金紵絲表裏辛丑
進詩謝恩三月己酉扈駕回京賜青紅氍子駝褐九年九
月榮復扈車駕巡邊給以天閑名馬光祿日供酒饌至洗
馬林而還比還恩賚甚厚正統十四年七月虜酋也先入
寇司禮監太監王振勸上親征車駕遂行內閣學士曹鼐
及侍讀學士張益等扈從賜賚如故事八月遇虜於土木
鎮鼐及益皆沒自後巡狩親征之事遂寢矣惟春正月有
事於郊祀始扈從焉例賜御廚茶飯宣德四年正月丁巳
大學士楊榮扈駕南郊賜金銀鮮果等物宏治十六年上

往郊祀大學士李東陽等候駕畢宿神樂觀茶飯外有特
賜者三蓋異數也東陽等爲詩記之正德十四年寧庶人
宸濠反旣就擒上猶南巡以親征爲名自稱威武大將軍
鎮國公朱壽大學士梁儲蔣冕扈從上用邊將江彬等言
欲卜郊畱都二人力諫乃止十五年十月北還又按洪武
八年十一月壬子上命皇太子暨諸王往中都詔學士宋
濂贊善孟益正字桂彥良等從行洪熙元年正月命皇大
子往祭皇陵孝陵右春坊大學士兼侍讀學士曾棨左諭
德兼侍讀周述等從行則是東宮行幸亦有扈從矣洪武
二十七年三月命韓濬二王往省秦晉燕周齊五府從官
各一十人用編修各一員則是諸王亦有扈從矣而會典

不載

畱守

永樂六年上將巡狩命尙書兼詹事蹇義金忠右春坊大學士黃淮左諭德楊士奇畱守諭之曰朕畱汝四人居守猶唐太宗簡輔弼監國必付房元齡卿等宜識朕意又以幾務事繁復命修撰王直副之凡南京政務惟文武除拜四夷朝獻邊警調發上請行在若祭祀賞罰一切之務有司具成式啓聞施行事竟則有司具本末奏達而已明年春車駕遂行十一月再巡狩命淮等與洗馬楊溥畱守十二年逮淮詣北京下獄溥亦坐累十五年春復巡北京畱義與士奇居守以待讀兼右贊善梁潛副之會謀譖監國

者事連潛十六年九月寘潛及司諫周冕於法皆漢庶人爲之也惟士奇始終以持重免於咎每言監國之體以尊君順親爲心皇太子嘉納之及卽位洪熙元年宣宗在東宮受命祀陵因畱南京監國舊學之臣曾棨輩皆從焉是年五月宮車宴駕少傅楊士奇少保黃淮太子少傅楊榮佐鄭襄二王監國而遣使迎宣宗宣德元年上親征漢藩淮以病不行畱佐鄭襄二王監國正統十四年七月上親征北虜命郕王居守每旦於闕左門西面受羣臣謁見朝政皆太監金英佐理之畱守者戶部尙書兼學士陳循工部右侍郎兼侍講學士高穀也

迎駕

永樂八年七月車駕還自北征皇太子遣大學士黃淮往
迎至滁州獲朝見洪熙元年五月宣廟自南京入卽位大
學士楊榮往迎於德州景泰元年八月十三日英宗自北
狩回鑾遣內閣學士許彬迎於宣府商輅迎候於居庸關
十四日駕至上關輅進見英宗命輅草書二封達於皇太
后及景帝十五日入居於南內正德十五年十月武宗南
征凱還駐通州者久之大學士楊廷和等出迓上戎服而
入十六年三月大學士梁儲等迎今上於安陸州四月癸
卯自安陸州云

充使

凡天子皇太子及親王冠禮內閣官充賓贊昏禮充納徵

等使冊封諸王及妃內閣官充正使若冊封副使以本院
官充者自成化末侍讀江瀾始也永樂洪熙宣德三朝冊
封諸王及妃內閣楊榮金幼孜各充正使者自後內閣不
復出使於外惟冠昏大禮則用舊規宣德三年三月癸未
大學士楊榮奉命持節冊中宮禮成賜白金鈔幣此類不
可勝紀若本院官因事出使者洪武三年五月遣編修蔡
元等訪歷代帝王陵寢永樂中修撰陳循被命往南京文
淵閣取儲書之類是也

使外國

凡朝鮮安南國頒詔及冊封學士等官充正使禮部預具
奏請待旨點用按洪武初侍讀學士張以寧使安南冊封

未至而國王死國人請授其世子以寧不聽遣人請命於朝且教其世子服三年喪并令其國人效中國行頓首稽首禮朝廷嘉之賜以勅書比之陸賈馬援并御製詩八以獎論之於是復命編修王廉吏部主事林唐臣充弔祭使以往且封其世子陳日燧爲王旣至其君臣出迎於郊議授受之禮往返數回不能決廉厲聲呵之乃奉御製文於綵輿迎入成禮而還四年二月戊午以寧等三人還自安南以寧卒於道日燧遣陪臣阮汝亮偕廉來上表謝恩貢方物上卽拜廉爲工部員外郎旌其勞也廉固辭不拜遂出丞澠池焉十二年十二月壬戌遣編修羅復仁兵部主事張福齋詔諭安南占城反復仁擢宏文館學士永樂初

遣待詔王延齡使朝鮮行人王彬副之人賜紵絲衣一襲
鈔二十五錠及錦衣皮裘狐帽自後使二國者俱賜一品
服其禮益隆云安南自郡縣復爲國正統中請封侍讀學
士錢溥充正使其王桀驚不恭授受迎拜皆不如禮溥以
書累爭之而後定承平久使外國者多治巨艦載重貨浮
海與其國爲市或與陪臣賡和誇奇角捷以爲才宏治初
侍講劉戩使安南考地志陸道南寧坦甚無虞乃乘肩輿
從兩僮忽抵其界巨人傾駭至之日頒詔明日燕燕畢遂
行餽以贐一不顧追授諸途不與語獨書其入關詩與之
曰歸裝有一南物者關神其殛諸後其部陪臣入謝表有
廷臣清白之語當時莫不多戩正德初侍讀徐穆充正使

碩正朔於朝鮮及境譯告國王不郊候迎詔不道跪穆援
古義稽今制反覆辨析皆如議王屢遣陪臣代質疑義穆
剖析不遺凡所餽獻悉拒弗納人咸稱之六年編修湛若
水充安南冊封正使餉遺一無所視獨和其王贈詩一章
論者謂其得體云

巡行

洪武元年八月命儒臣十人分行十道訪求賢哲隱逸之
士於是學士詹同等往焉

攝行御史

洪武初上命編修王璉等攝行御史璉按河南入對稱旨
上悅謂近臣曰文華堂諸生如璉等皆異日將相才也九

年三月丙子以璉及編修馬亮任敬王懌陳敏張唯典籍
王偁應奉殷哲侍儀使孫化祕書直長蕭韶贊讀閻裕起
居注嚴鈍給事中方徵彭通宋善王惟吉十六人爲監察
御史十年正月乙丑復命編修桑慎陳晟署監察御史二
十九年口月復以編修景清爲監察御史尋署僉都御史
其重憲職如此永樂末侍講李時勉修撰羅汝敬皆降監
察御史是又與洪武時不同

分鎮要地

正統十四年八月景帝卽位以上皇末復寇方內逼乃命
侍講徐瑄等十五人分鎮其地瑄得彰德餘人不可考或
曰楊鼎王詢與焉瑄卽有貞也成化中修撰張頤擢僉都

御史巡撫居庸豈援此以爲例與

代祀

凡祈告代祀多用本院儒臣正統乙丑浙江台寧等府民
遭疫死甚衆上遣禮部侍郎兼侍講學士王英齋香幣往
祀南鎮以禳民厲時浙閒久旱英至紹興大雨水深二尺
灌獻之夕雨止星見明日又大雨田野沾足人皆喜曰此
侍郎雨也布政使孫原貞等陪祀請爲御祭感應記刻石
於廟而還景泰辛未夏不雨特遣侍講學士劉鉉祀濟瀆
成化甲辰陝西旱遣禮部左侍郎兼學士徐溥代祀中鎮
西海河瀆諸神雨輒應丁酉朝廷用儒臣議追崇先聖禮
樂遣學士王獻祭告闕里宏治己未六月孔廟災學士李

傑奉詔祭告甲子閏四月孔廟重建落成復遣大學士李東陽祭告焉

陪祀分獻

凡郊祀五品以上官例得看牲次早復命陪祀皆與若分獻用文武大臣及近侍官二十四員太常寺請旨點充故本院官自檢討以上皆與永樂中修撰馬鐸建言國子監分獻十哲宜用翰林院官朝廷從之

讞獄

洪武十四年十月癸丑命法司論囚擬律奏聞從翰林院給事中及春坊正字司直郎會議平允然後覆奏論決永樂二十二年十月丁巳大理寺奏決重囚仁宗召大學士

朝本言卷第一
楊士奇楊榮金幼孜至榻前諭曰比歲法司濫刑往往出於鍛鍊先帝嘗切戒之必會三學士同審正統中侍講學士馬愉嘗奏讞獄終年不決者朝廷從之由是冤抑多申理然惜其未能復洪武之舊也

主宴

凡筵宴之賜賚臣下者令大臣待之謂之主宴天順四年天下諸司官吏朝覲至京上召大學士李賢諭之曰黜陟之典亦當舉行賢對曰此祖宗舊制卽勅吏部都察院退不職者數百人旌其才行超卓政績顯著者布政以下賈銓等十人賜以衣服楮幣禮部筵宴命賢及吏部尙書王翱待宴以勵其衆正德以來武舉會武宴例用內閣大臣

一員主席兵部先期奏請

齋宿

凡郊祀洪武二十年定齋戒日期文武百官先沐浴更衣
本衙門宿歇次日聽誓戒致齋三日宗廟社稷亦致齋三
日惟不誓戒或朝廷祈禱亦如之所謂齋戒者不飲酒不
食葱韭薤蒜不問病不弔喪不理刑名不與妻妾同處也
成化丙申十二月十日禱雪致齋於翰林之東署侍讀倪
岳侍講陳敏政修撰陸鈇編修陸簡同宿是夜雪大作遂
用歐公禁體故事相與鬪韻聯句以志喜鈞奇競勝達旦
弗能休前輩風致可想見也而禱雪致齋亦僅見於此

習儀

翰林舊不習儀以禮所自出故也成化十四年冬至有新旨學士王獻而下俱與常參官赴朝天宮習儀至今循之此恐當復成憲之舊不然與百司無別矣

陵祀

洪武八年十月乙卯詔翰林院考定陵寢朔望節序祭祀之禮學士樂韶鳳等奏今擬每歲元旦清明七月望十月朔冬夏二至日用太牢其伏臘社每歲朔望日則用特羊祠祭署官行禮如節與朔望伏臘社同日則用節禮從之其後清明中元冬至祭祀列聖陵寢分遣勳戚大臣行禮本院官例用二員陪祭永樂元年太祖皇帝忌辰上率諸王奉先殿行禮畢仍率諸百官躬詣孝陵致祭令近侍官

於殿前行禮宣宗嘗奉皇太后謁長陵獻陵內閣大學士
皆從焉自是乘輿無躬往者而本院官上陵陪祀例宿昌
平學宮行館云始自成化戊戌近坊局等官亦與陵祀遵
詔旨也

受顧命

永樂二十二年七月辛卯車駕至榆木川不豫召大學士
楊榮等受遺命傳位皇太子遂崩榮等一遵古禮斂含如
度與太監馬雲等議曰六師去京師尙遠不宜發喪宜上
食奏事如常儀眾是之復條畫軍中事益嚴號令人皆莫
測時議者有欲假他事作勅用寶馳報者榮曰先帝在稱
勅今稱勅是詐也罪孰當之壬辰次雙峯榮奉遺命馳計

皇太子八月甲辰至北京致大行皇帝遺命而後以軍中所宜施行者陳之皇太子嘉歎賜以白金鈔幣召吏部尙書蹇義使識之行將大用翊旦復承命同義等議卽位事宜榮首條民間不便二十餘事上皆嘉納入詔條行之丁巳仁宗卽位賜白金鈔幣已未進太常寺卿仍兼前二職十二月加工部尙書仍兼二職三俸俱支賜白金五十兩綵幣十表裏寶鈔二萬貫白米二十石降勅獎諭酬勞也洪熙元年五月辛巳仁宗崩六月庚戌宣宗卽位宣德十年正月甲戌宣宗崩壬午英宗卽位受遺今皆莫考可齋雜記云天順甲申正月朔日以後上不豫每日猶裁決萬幾如常至初十以來疾大漸乃處置後事命太監牛玉執

筆口使書其一東宮卽位過百日成昏其二定后妃名分
其三命勿以嬪御殉其四殯斂器服語意詳盡皆合天理
當人心書畢且命牛曰將去閣下看令爲我潤色之旣至
臣時等驚愕曰何至是牛曰上意謂事不可測且說下不
用何妨臣等欽誦畢皆歎曰所言關大體非英明不能及
此而止殉事尤高出古今真盛德事也不須潤色言畢時
不覺淚下牛玉備以前言復命且曰彭時尤悲愴上聞之
亦隕涕已而曰且收着待我去後遵行次日牛出道其詳
因曰上英偉從來不墮淚今若此事可知矣至十七日遂
崩次日早儲皇披髮衣素出後右門召內閣學士李賢陳
文暨時及文武執政大臣等至前言曰父皇已賓天爾等

盡心輔佐我因泣下羣臣皆俯伏號泣良久皆起叩頭而退是日有旨命太監劉永誠夏時傅恭牛玉會昌侯孫繼宗懷寧侯孫鏗尙書王翱李賢年富馬昂侍郎陳文及時爲議事官公同計議處置軍國大事遵宣德十年例也預者皆荷銀幣之賜燕對錄云宏治十八年五月聞上不豫初六日昧爽司禮監太監戴義出左掖門宣內閣臣東陽頃之趣者六七次臣健臣遷繼至乃同入趣者道相屬入乾清門右門由右街升殿入東戶轉西南右戶北行數步穿重幔上仙橋又數步見御榻上著黃色便服坐榻中南面臣健等叩頭上令近前者再旣近榻又曰上來於是直叩榻下上曰朕承祖宗大統在位十八年今年三十六歲

乃得此疾殆不能興故與先生每相見時上玉色發赤火
聲盛氣臣健等皆對曰陛下萬壽無疆偶爾違和暫須調
攝安得遽爲此言上曰朕自知之亦有天命不可強也因
呼水漱口掌御藥事太監張愉取金盃進水以青布抵舌
勸上進藥不答愉曰再進此一服卽無事矣上又曰朕爲
祖宗守法度不敢怠荒凡天下事先生每多費心我知道
因執臣健手若將永訣者上又曰朕蒙皇考厚恩選張氏
爲皇后成化二十三年某月成昏至宏治三年九月二十
四日生東宮今十五歲矣尙未選昏社稷事重可亟令禮
部舉行皆應曰諾時司禮監太監陳寬李榮蕭敬等以次
畢至皆羅跪榻外上曰授遺旨扶安李璋捧筆硯戴義就

榻前書之上又曰東宮聰明但年幼好逸樂先生每勤請
他出來讀些書輔導他做個好人臣健等皆叩頭仰奏曰
臣等敢不盡力上復加慰諭而退是日雖在倉卒天語詳
備累數百言不能悉記而其重且大者如此臣健等出至
後左門調旨傳禮部行之戴義送出東角門而入越一夕
而龍馭上賓矣追念先皇帝簡任眷遇之恩顧托委付之
意誠古帝王所不及俯仰之間已如隔世扣地籲天無所
逮及可勝痛哉後東陽每遇五月七日孝宗皇帝忌辰作
詩志痛有曰曾上鑾坡侍玉堂朝衣親惹御袍香傳宣煖
閣奉天天顏近奏事平臺中右午漏長化國有人悲短夢
門後幽都無地仰餘光從容顧命分明語一日傷心淚萬行又

日六年揮淚泣遺弓萬國傷心此日同龍去鼎湖還作雨
馬嘶沙苑尙思風碧桃宴已歸天上玉几言猶似夢中曾
是白頭香案吏不須凝望朶雲紅

護塋

永樂二十二年十二月丁巳太宗皇帝塋長陵命大學士
楊榮護塋事賜白金鈔幣宣德十年正月丁亥榮往相視
山陵還稱旨復有白金鈔幣之賜六月戊申命護梓宮塋
景陵賜白金一百兩紵絲十表裏鈔二十錠山陵畢復賜
白金鈔幣十月辛亥命監立天壽山碑賜白金五十兩紵
絲羅四表裏及上尊珍饌按宋宰相例充山陵使國朝惟
屬之禮部護塋用勳戚啓元宮視事例用本院官二員若

榮之護蓋內閣所僅見也

翰林記卷第十五